

Tujetsch

Pign temps da glatsch (1400–1850)

Ina schelta da schabetgs, disgrazias, lavinas, fomazs, scartezias, pandemias e barschaments ella Val Tujetsch, nudai ed attestai en urbaris, rodels, cudischs e documents.

Co ils habitonts han viviu e declarau ils extrems dall'aura

Il pign temps da glatsch ha beinsavens purtau extrems d'aura ella Val Tujetsch: aschia unviarns liungs cun nevadas e stads bletschas. Las consequenzas ein stadas raccoltas schliatas, lavinas, boas ed inundaziuns. Aschia han ferdaglias rigurusas, garnezi madirau tardiv ni insumma negina raccolta, muvels carpentai, praus e pastiras destruidas caracterisau il mintgadi. En annuaris, cronicas ed ella tradiziun restan en memoria oravontut ils onns schliats, unviarns da fomaz, pestilenzas, eveniments da lavinas, barschaments e carischias. Ils carstgauns enconuschevan buca il plaid clima, bein aber ina buna memoria per midadas. Els vegls seregordan da temps pli levvs ferton ch'ils giuvens vivevan la direzia dil temps present e dils decennis novs.

Situaziuns extremas vegnevan giudicadas sco segns da castitgs, emprovas ni admoniziuns entras Diu. Processiuns, devoziuns, vuts, ereger capluttas e baselgias, tschentar cruschs sper via, fuvan las rispostas sin quei mund malsegir. Eveniments natirals vegnevan directamein colligiai cugl uorden religius. Quels muments sviluppeschan ils Tuatschins in'aula forza pratica da giudicar. Els emprendan d'untgir spundas malsegiras da lavinas, da far reservas da vivonda, d'adattar l'alpicultura, il diember dalla biestga e la finala fan biars ponderaziuns d'emigrar. Aschia ei la veta els aults in equilibrar denter prighel ed adattaziun – in dialog denter carstgaun e cuntrada e quei clima ch'els sentevan senza saver numnar.

Clima e veta alpina el decuors dils tschentaners

Denter il 9 e 12avel tschentaner regeva in temps pli cauld, numnaus «Optimum climatic medieval». Las temperaturas eran da quei da 1.2 fin 1.4 grads pli aultas che oz, cun dapli sulegl e pli pauca plievgia. Quei clima ha favorisau il cultivar garnezi e la colonisaziun da regiuns alpinas els aults – el Grischun entochen 200 meters pli ault che oz. Suenter 1200 ha il clima entschiet a vegnir pli frestgs. Etappas freidas suondan entochen l'entschatta dil «Pign temps da glatsch» entuorn 1400, cul pli extrem alla fin dil 17avel tschentaner e cuoza tochen ver 1850. En quei temps eran ils unviarns stregns, las stads frestgas e bletschas. Ils glatschers ein carschi entochen bass giu en las vals. Oz eisi il cuntrari: ina prigulosa tempradira globala.

Entuorn 1200, il temps dall'erecziun dalla baselgia da s.Vigeli a Sedrun ed il temps dalla construcziun dil casti da Putnengia, regeva ella val in migeivel clima. Il cunfin d'uaul fuva sesalzaus tochen sin varga 2000 meters sur mar. Local ha quei possibilitau dapli pastira per la stad e la raccolta da garnezi pli gronda e pli egl ault. Els cunfins da diever dallas alps fuvan medemamein pli egl ault, grob 100 meters, local schizun dapli. Quei possibilitescha la carschen da dapli uaul da schurmetg els aults che svanescha lu il temps Pign temps da glatsch. Els glatschers daventan ella media pli cuorts e satels, las lieungas seretilan dallas vals siaden. Quei permetta ina pli liunga alpegiaziun cun dapli nuorsas e biestga en certas alps. Mises sefuorman pli els ault, medemamein era ils praus maghers.

Ils aults daventan attractivs da habitar ed ils pass survegnan dapli impurtonza cun cundiziuns pli stabilas la stad. In pli liung temps senza neiv els aults levgiescha il transit suls Pass Alpsu, Pass La Crusch ed il Lucmagn. Il dus davos numnai valevan sco ina dallas transversalas impurtontas nord sid avon l'avertura dalla Val Caschinutta cun la Punt dil Giavel, menziunada l'emprema gada igl onn 1306.

Hospezis e sendas da sauma gudogna dapli impurtonza.

La cultivaziun resta ina resca cun purginas e fermas precipitaziuns pericliteschan il viver. La tecnica ellas alps ei tradiziunala, quella secumprovada. Decisiva ei la cultivaziun cul sistem da cultivaziun da treis semenzas, il crieu grev ed ils mulins. La preferenza da graun schai el dumiech e segal. Ina cultivaziun denter ~1600 – 1800 m s.m. resta plitost in'exceptiun, aschia per semeglia a Tschamut sin 1667 m. Els aults eran vinavon fragils cun grondas sperditas da raccolta arisguard il clima.

En quella fasa favoreivla croda l'immigraziun dils Gualsers en nossa val. Quei schabegia el decuors dil 12 e 13avel tschentaner. La stimulaziun da quella colonisaziun succeda entras la claustra da Mustér.

Igl effect da quei temps d'in clima pli cauld semuossa positivamein ella pasculaziun els aults ed en las vias stagiunalas. Las pli grondas raccoltas ein denton stadas sut las zonas alpinas aultas, en Tujetsch el funs dalla val.

Denter 1400 e 1850 ha l'Europa fatg atras ina perioda che vegn numnada il «Pign temps da glatsch». Era las Alps ed aschia era la val Tujetsch ei stada fermamein pertuccada. Glatschers ein s'avanzai lunsch a val, han smanatschau las alps e sminuiu las pastiras. Il clima ei staus marcaus da liungs e grevs unviarns sco era da stads frestgas e bletschas. En Tujetsch ha quei giu la conseguenza ch'ils uclauns els aults, quels populai dils Gualsers sco Scharinas, Caspaua, Planatsch, Mulinatsch, Giuv, Davet, Malamusa, Mila, Sax ed ella vischinonza da Tschamut Platte, Mühlematt, Müren, Bollimatte, Blüel, han stuiu vegnir bandunai. La populaziun ei seretratga giu els vonns dalla val. Els endisch vitgs dalla val dad oz sefuorman.

Pils habitonts da Tujetsch ha quei temps muntau grondas sfidas: schliatas raccoltas, fomazs e prighels dalla natira fuvan ina part dil mintgadi durant dis ed onns, gie decennis e tschentaners. Cultira ei vegnida cuvretga da glatschers e lavinas han destruiu casas, clavaus. Las stads cuortas han menau a munconza da vivonda per pievel e muvel. La religiun e las tradiziuns decidan igl agir e las reacziuns dalla populaziun: processions, penetenzias, oraziuns e benedicziuns entras ils plevons duevan calmar las forza dalla natira.

En Tujetsch ei quella fasa struschamein documentada e tuttina dat ei tscheu e leu el decuors dils tschentaners notizias che laian concluder l'influenza dalla midada climatica. Ina dallas pli impurtontas fontaunas ei igl Anniversari da 1456 egl archiv dalla Pleiv Tujetsch ch'entscheiva circa entuorn 1450, cheu numnaus Anniversari 1456. Alla populaziun restava ei nuot auter che d'acceptar las midadas, formar ina stretga cuminonza ed aschia dumignar las midadas cun agid vicendeivel.

Cun la fin dil Pign temps da glatsch entuorn 1850 ha ina nova fasa entschiet: Els glatschers ein tec a tec seretratgs, il clima ei vegnius pli migeivels e l'agricultura ha plaunsiu saviu sestabilisar tochen si els aults. Tuttina ein ils fastitgs da quels tschentaners visibels tochen oz el spazi natural ed el memoria collectiva dalla historia.

Ina survesta atras ils tschentaners

15avel tschentaner, 1400 – 1500

Il clima vegn pli frestgs e freids en l'entira Europa. Els glatschers entscheivan a crescer ellas alps. Bia plievgia cun in clima bletsch. Unviarns liungs e cuortas stads e consequentamein schliatas raccoltas.

1456

Ils 23 d'uost 1456, il di avon S. Barclamiu, hai ei dau ella Surselva, cunzun el contuorn dil Pass Alpsu, ina gronda nevada ch'ei setschentada sur praus e cultira e che ha mess a tiara il garnezi, aschia ch'el ha buca pli pudiu serevegnir. Sinquei ha ei dau fermas purginas d'in di sin l'auter ed il graun ei selavagaus dil tuttafatg. En Tujetsch ein las miserias stadas grondas entras la munconza da vivonda per habitonts e biestga. Tut priu ina stad da pauca valeta, bunamein mendra che gl'atun ed ei ha sempermai pluui.

Anniversari 1456

1456

Beins, uclauns e vitgs

La situaziun da viver en Tujetsch fuva tenor igl Anniversari dalla pleiv da 1456 ed il Rodel da tscheins da 1555 empau outra. Sin fundament da quels dus documents eisi stau pusseivel d'eruir ils vitgs, uclauns e beins en Tujetsch dil 15/16avel tschentaner. Quella lavur ha Giachen Casper Muoth fatg e publicau igl onn 1898. En tut ha el erui 66 habitadis. Da quels 66 beins ein 45 buca mo singuls beins, mobein pli grondas gruppas da casas cun entgins baghetgs e casas. Ils numerus beins vegnevan per ordinari habitai da pliras famiglias, carteivel parentella ni da glied derivonta dil medem liug. Mintga bein ni uclaun possedeve atgnas pastiras da casa, agens mises, schizun atgnas alps, sco per semeglia Tschamut. Tut quels uclauns ensemen formavan gia 1325 ina communitad, ils "vicini de Tuvez", la cuminonza dils habitonts da Tujetsch. Quella communitad vegn era francada en in document da 1332. En quel debitavan ils Tuatschins alla vischnaunca da Chironico/Tessin igl ieli per las glischs perpetnas da lur treis baselgias.

Biars beins ed uclauns ein vegni bandunai en consequenza dallas midadas climaticas enteifer il Pign temps da glatsch. Ordlunder ein lu daventai mises ni aclas. En ina cuminonza pli gronda giu els vonns dalla val sesentan els pli segirs e susteni vicendeivlamein en cass da miserias e disgrazias.

Era igl uaul els aults sto tec a tec ceder al clima. Sil Pass Alpsu ei avon paucs onns vegniu anflau plontunas ed a Plidutscha (sin 2050 m s.m.) ei aunc oz da veser il best d'ina plontuna el dutg da Plidutscha (Aua da Urlaun). Plinavon ei duront onns vegniu raccoltau turba davart uranèsa alla riva dil lac.

Ils habitonts dalla val ston s'adattar e viver cun quellas relaziuns. Pavel e fein vegnan pli scarts. Il graun ha breigias da madirar. Quels tschentaners vivevan ils habitonts oravontut dalla tratga da nuorsas. Igl onn 1390 seprofiteschan ils Tuatschins cun saver secumprar libers dil tscheins per nuorsas entras avat Johannes. Il recav da 103 "churwälsche Mark" ha surviu alla claustra per reconstruir la claustra ch'era barschada giu treis onns avon.

1458/59

Igl onn 1458, la sera avon la fiasta da sogn Gagl, ils 15 d'october, ha ei dau ina gronda nevada en vischnaunca ed en las regiuns vischinontas. Naven da lu tochen Daniev ei stau in unviern passabel.

Entuorn Daniev digl onn 1459 ha ei dau ina gronda nevada ed ei ha fatg stermentus'aura d'unviern entochen il di da s. Vincenz, ils 22 da schaner, nua che l'aura ei setratga si. Quei di ein sedisch persunas mortas en Tujetsch ed il di avon la fiasta dalla conversiun da sogn Paul, ils 24 da schaner, ein aunc sedisch outras persunas mortas. La neiv era aschi dira ch'ins pudeva ir a cavagl sin ella. En Tujetsch ei la neiv restada ditg ed ils 2 da matg era ella aunc schelada aschi ferm ch'ins pudeva ir suro e cavalcar "sco sin via". Da miez matg han ins pudiu arar e

semnar. Ei ha lura dau nauschas purginas e donnegiau il graun, ed igl ei vegniu carischia.»

Anniversari 1456

16avel tschentaner, 1500–1600

En general serepetan adina puspei onns da scartezia e fomaz. Il pievel fa processions, ils plevons fan benedicziuns encunter ils glatschers s'avanzonts e rogan per aura favoreivla ed unviarns migeivels. Ils glatschers contonschan novas grondezias.

1556

Igl onn 1566 ha ina nauscha pestilenza tschaffau la populaziun dalla val. Ella ei sederasada dalla Surselva siado. Ella val mieran en tuts vitgs entiras famiglias. Tenor igl anniversari ed autras fontaunas mieran 600 persunas. La pleiv da Tujetsch dumbrava lu buca pli che 800/900 persunas. Quei vul dir che rodond 60% dalla populaziun ei morta. Bia casas ein daventadas vitas ni schizun vegnidas dadas fiug per retener l'infecziun. Il praus restan nunutilisai e la biestga sillas alps e pastiras senza patrun. Ellas cronicas vegn nudau d'in «terribel onn da pestilenza». In onn che ha influenzau la memoria duront decennis a moda nunstizzeivla.

Anniversari 1456.

1557

Pli da vegl ei il Drun che taglia empermiez ils dus vischinadis Gonda e Sedrun, staus in dutget nausch giu dil Cuolm da Vi. Buca pli gronds ch'il Dutg grond denter Zarcuns e Rueras. Sco aunc oz flessegia el denter Salins e Pitgmun giu e sut Sedrun sbucca el el Rein. Mo duront ils tschentaners dil Pign temps da glatsch ha il Drun fatg grop. En in document dils 12 da matg 1557 vegn il «Run» numnaus per l'emprema ga in dargun. El ha caschunau donns e clamau ils vischins avon dertgira per sedustar davart il manteniment ed ils cuosts. Il mistral dalla Cadi, Gielli Maissen, ha schau clamar la part plonschenta e la cunterpart a Mustér avon dertgira. Ils plonschiders da Salins, Gonda e Sedrun fan valer ch'il Drun hagi priu naven la via che la glieud sezza e las menadiras ed ils «tiers» sappien buca sesurvire pli dad ella d'ir sils praus sur Salins, en Prau Strem, el mises da Valtgeva ed en l'alp da Strem. Ils vischins da Gonda e Sedrun garegian che quels dils praus peinen e slarghien la via ch'ins sappi far diever d'ella.

La sentenza secloma: «*La via da Salins ensi duei vegnir slargada ch'ella hagi ina ladezia da treis ed in miez bratschs, circa dus meters. Pustar danovamein la seiv ei caussa dils possessurs dil prau. Ils plonschiders pagan ils cuosts, denton mo quels dall'emprema ga. Suenter ha il possessur dil prau sez da star buns per la seiv. Da Salins engiu duei la via suenter il Drun semeglientamein vegnir slargada. Turnass la via ad ir giu el Drun, duein ils geraus da vischnaunca ver quitaun dad ella en tuts graus.*»

Document dils 12 da matg 1557 egl Archiv communal Tujetsch

1565

Extrem freida e bletscha stad. Differentas cronicas svizras menziuneschan plievias cuzzontas ed inundaziuns. Freid invernial a partir digl uost e baul igl atun arriva igl unviern. Ellas Alps, era el Grischun, dat ei schliatas raccoltas: fein e garnezi ein smarschi sils praus ed èrs. La biestga ei vegnida descargada fetg baul dallas alps e quei ha procurau per ina gronda miseria da pavel.

1566

Igl anniversari da 1456 noda sut igl onn 1566: «*Ferdaglia unviern cun fetg bia neiv, 16 calzers ault, quei ein 4.75 meters ault. Scheltiras tochen il zercladur. La neiv ei restada fetg*

ditg la primavera e tuttina ha ei dau bia fein e graun.»
Anniversari da 1456 (17 d'avrel).

Fomaz en parts dil Grischun. Cronicas contemporanas tschontscha era da malsognas dalla biestga el Grischun.

1568

Suenter la sgarscheivla pesta da 1556 cun 600 morts suonda igl onn 1568 ina secunda, evidentamein pli pintga, che pretenda tuttina rodund 200 morts, quasi in tschunavel dalla populaziun da gliez temps. La pestilenza arriva la primavera, carteivel cun viandonts neu digl Uri sul Pass Alpsu. Ella tschaffa oravontut ils habitonts da Rueras, Camischolas e Sedrun,. La pesta sederasa spertamein il temps da stad e secalma lu puspei igl atun. Per tons morts vegneva cavau ina fossa comunabla cun igl ordinari accumpignament dalla baselgia catolica cun gronda consternaziun e tristezza.

L'unda da 1568 ei stada cuorta, mo tuttina drammatica. Ella tucca ina populaziun ch'era aunc buca serevegnida dalla catastrofa epidemica da 1556. Entriras famiglias svaneschan. Ils onns suandonts succeda ina pli ferma immigraziun ord las vals vischinontas, famiglias da Medel, Mustér, dalla Cadi en general e neu dad Ursera. Beins e vitgs bandunai e fermamein reduci dalla populaziun retscheivan aschia nova veta e la cultivaziun necessaria.

Anniversari 1456.

1570/1571

Regularmein ha ei dau sgarscheivels onns da fomaz. Aschia ein nudai ils onns 1570/1571, lu 1693–94 e lu pli tard igl onn 1817 «quel dalla fom». Biars ein morts, auters ston viver in minimum d'existenza.

Suenter ils onns da pestilenzas 1556 e 1568 resta il clima instabils e frestgs. Ils onns 1569 tochen 1571 portan specialmein freids e liungs unviarns, purginas tochen il zercladur e stads bletschas e consequentamein raccoltas smarschidas e degeneradas.

Igl unviern 1570/71 ei staus extraordinari stregns, bia neiv gia igl october, freid cuzzont tochen Pastgas. La stad 1571 cuorta e freida. Ei vegn plidau d'ina stad cun pauc sulegl. Las consequenzas: oravontut fomaz. Il pievel ha stuiu retrer garnezi neu digl Uri e si da Glion e contuorn encunter biestga e lavur.

Autras cronicas nodan: Garnezi e fein strusch madirau. Las davosas reservas da dumiec e segal duvradas. Armauls ein gia baul vegni mazzai, las famiglias vivevan da suppas da latg, ragischs e caschiel sechenta.

Tujetsch steva alla fin d'ina perioda da 15 onns crisa, 1556 tochen 1571 cun 800 morts da pestilenzas, ferdaglias, fomaz e paupradad. Per quei tschentaner fuvà ei denton aunc buca finiu cun las disgrazias, ei suondan aunc ils onns da miseria 1584/85.

1578

Igl onn 1578 ei ina part d'ina seria dad onns freids e da fomaz el Grischun. Suenter ils grevs unviarns e fomaz da 1570 e 1571 serevegn il clima struschamein. Igl onn 1578 attestan pliras cronicas: primavera tardiva, neiv entochen il matg, stad freida e bletscha, sperdita da raccolta sin altezias sur 1200. Munconza da fein e garnezi, venditas sfurzadas da biestga. En diversas vals scartezia da paun e commerci da brat per frina. Il cronist tuatschin resumescha quei aschia: „*Il graun ha quasi muncau en Tujetsch*“, in avis da raccoltas miserablas e fomaz. - Denter ils onns 1560 e 1580 han las ferdaglias persistentas schau claramain lur fastitgs era en Tujetsch. Il graun

madira adina pli mal e las raccoltas fuvan periclitadas ni curdavan schizun ora.
Anniversari da 1456

1584/85

Dalla muria gronda da 1584/85 seigien 800 persunas mortas, Hans Ardüser (1557–ca. 1617) numna 500 persunas en sia Cronica Retica.
Anniversari 1456.

Cudisch da Tujetsch 1986:

«Avon che la pestilenza, la pli gronda muria, ei dada a dies els vischinadis da Tujetsch, fuvan ils avdents gia miez spossai. Carplinas e fomazs e biars habitonts ein vegni malsaus e numerus han stuiu suttacumber. Nevadas ed auas grondas cun onns ora raccoltas fallidas. Carischia e prezis aults sco per semeglia ils prezis digl onn 1585, midau dils risculdis ella valuta da francs:

in malter garnezi (22 curtaunas, 660 kg) custava	38,60 frs.
ina tschuncheisma fein ha custau	10,40 frs.

Per capir tucca ei da metter en cumparegliaziun cun la vendita ed il gudogn da lezs onns:

ina vacca cun vadi ha pagau	34,00 frs.
ina fumitgasa gudignava per onn	11,90 frs.
la schurnada d'in um ha muntau a	0,20 frs.

La tradiziun ha manteniu la suandonta raquintaziun: *Dadens Sumsassi fuvi ei vanzau sulettamein duas persunas. E quellas duas vevien nuota propi bugen ina l'autra; ellas vevien e tema da sepigliar. Tondanavon - che l'ina mavi dalla vart da Surrein encunter la Bullatscha per ir anora, l'autra encuntercomi atras las plauncas e siviars Caspausa dad ir a messa a Sedrun - pervia dalla tema dalla pestilenza. Da Putnengia anora assistevien ellas alla messa e turnavien silsuc dalla medema via anen.*

Da quei temps, la secunda mesadad dil 16avel tschentaner, vegn la populaziun tuccada d'in squetsch nunsupportabel entras malsognas ed epidemias. Il risico permanent da murir d'ina pestilenza e la munconza da pusseivladads da mitigar il mal ni da curar, han marcau la veta da biars. Numerusas famiglias han piars lur affons gia baul, bia dunnas murevan dalla pigliola e la pesta pretendeva grondas unfrendas.

Las cefras dils morts en Tujetsch duront las pestilenzas ein bein da veser sco in schazetg, buca dapli e las indicaziuns secunterdian tscheu e leu ellas cronicas. Il diember fa impressiun:

1556	600 persunas mortas
1568	200 persunas mortas
1584 (Ardüser di 500)	800 persunas mortas
1635	70 persunas mortas
1637	70 persunas mortas

Quei dat 1740 persunas mortas dalla pestilenza. Ina damonda sefa legend quellas cefras: Co fuva Tujetsch populau quels onns? Tenor las statisticas da silsunter ha Tujetsch giu tschentaners pressapau 850 habitonts, silmeins dapi l'entschatta dil schotgavel tschentaner e mo ual ils dus onns 1796 e 1835 dapli che melli persunas e per cun 1941 varga il diember permanentamein il melli.»

1588

Igl onn 1588 ha il graun quasi muncau en Tujetsch. Il motiv sco adina: liung unviern, purginas la primavera, stad bletscha e freida e baul purginas. Las consequenzas ein: il pievel pitescha dalla fom, il graun sto vegnir retratgas dalla Bassa ed ei fetg cars.

Anniversari da 1456

1591

«Gl'onn 1591, ils 14 da matg, ein otg frars parti da Mustér sin viadi a Jerusalem en Tiarasontga per visitar la fossa da Jesus Cristus ed auters loghens sogns. Els ein tuts turnai a casa en buna sanadad. Treis fuvan oriunds da Tujetsch, numnadamein Johannes Liam, Martin Mon e Martin da Bunney (Bugnei)».

Anniversari 1456, 30 d'avrel.

Savens vegneva tiel pievel encuretga ina renovaziun religiosa e la protecziun spirituala; aschia fuvan pelegrinadis e vuts ina risposta derasada sin quels onns da miseria.

1596

Igl onn 1596 ha Andres de Sax piars la veta. El ei serendius sil cuolm per transportar a casa fein a pastg. Enten far liber la neiv ei quella sedistacada sco lavina. Disgraziadamein eis el aunc curdaus giud in grep ed ha anflau la mort.

Anniversari 1456.

1550 – 1800

El spazi dil temps denter 1550 – 1800 fuva ei per 2,5 grads pli freid che per semeglia igl onn 2009.

17avel tschentaner, 1600 – 1700

Era duront il 17avel tschentaner fuva il viver en Tujetsch dir e signaus da malsegirtad. Sper ina strentga pratica religiosa en connex cun la reformaziun e regulativs profans, pitevan ils carstgauns oravontut da malsognas ed epidemias. Adina puspei pestas che tuccavan principalmein ils affons e dunnas en pigliola. Accidents e semplas malsognas menavan savens alla mort. La tema da fomaz, ferdaglias e malsognas signavan la veta da mintgadi. Malgrad quellas cundiziuns da viver ha la populaziun realisau remarcablas prestaziuns. En quei tschentaner vegnan tschun capluttas baghegiadas e la baselgia parochiala da s.Vigeli a Sedrun reconstruida. In mussament d'ina cardientscha profunda e d'in spért da cuminonza extraordinari ella populaziun – forse era ina reacziun sin la smanatscha dalla reformaziun che s'avischinava en nossa vallada. - Las Alps ein signadas cun onns da ferdaglias e nevadas, cun stads cuortas, bletschas e freidas. Lavinas destrueschan e plirs glatschers cuvieran alps e pastiras; en Svizra ei la carschen dils glatschers a Grindelwald bein documentada ed enconuschenta.

1600

El sid da Peru explodescha il vulcan Huaynaputina ils 19 da fevrer 1600 e procura per ina sferdentada globala dil clima. La pli ferma explosiun dils davos 2000 onns. El fiera varga 30 km³ (30 milliardas meters cubic) tschendra e dioxit da zuolper ell'atmosfera. Ils partichels serepartan mundialmein e reflecteschan ils radis dil sulegl anavos egl univers. Els onns 1601 – 1603 sesbassa la media dalla temperatura per ver 1 grad Celsius – ell'Europa schizun claramain dapli. Consquenzas per l'Europa: La stad 1601 ei stada ina dallas pli freidas digl entir millenni. Contemporans rapportan da neiv il zercladur, miserablas tochen negina raccolta e

fomaz. En bia parts dall'Europa schelan ils flums era ella Bassa. La vendemia croda, il garnezi smarschescha sils èrs. Quella perioda freida marchescha l'entschatta dalla fasa strentga dil Pign temps da glatsch. El Grischun: Fontaunas contemporanas rapportan da miserablas stads ils onns 1601 – 1603, munconza da fein e garnezi, gronda sperdita da biestga igl unviern, malsognas tiella biestga muort sotalimentaziun. L'alpicultura pitescha fetg entras neiv tumpriva, marschauna tardiva e strusch carschientscha dil pastg. Bia alps restan nunutilisadas muort vias intransiblas e scheladas. Carischia sin las fieras e paun e caschiel d'aventan artechels da luxus. En Tujetsch: scheliras e munconza da pavel, mezcas urgentas. Neiv igl uost. Igl onn 1620 vegn numnaus onn da fom e bia famiglias han dumignau da surviver cun brattar rauba cun vivonda e cun igl agid enteifer la vischnaunca. Valan las erecziun dalla numerusas capluttas e baselgia era sc'in clom d'agid? En priedis e processions ei vegniu rugau per megliera aura e buna raccolta da garnezi.

Quella sferdentada dat l'entschatta d'ina perioda freida da rodund 200 onns entochen circa 1800. Ils glatschers creschan e lavinas destrueschan. La savida d'esser dependents da cundiziuns climaticas extremas ha marcau la veta ed il patertgar dalla populaziun entochen el 18avel tschentaner.

1609

Igl onn 1609 serendan 27 pelegrins tuatschins a Santiago di Compostella en Portugal. Ils emprems diesch valan sco persunalitads e secloman: Commissari Martin de Florin, Cavalier Jon Liamb, Cavalier Martin Mon, Cavalier Jon pitschen, Statalter Gilli Genin, Gilli Jon de Giuff, Placi de Sax, Michael Ruom, Jonet Jon de Medell. Tiel retuorn ei la Confraternitad da s.Giachen vegnida fundada ella baselgia da s.Vigeli ch'ei semantenida entochen all'entschatta dil 19avel tschentaner. Quels pelegrinadis vegnevan capi sco engraziaments, mo era sco penetienzas e per rugar per in general megliurament dallas cundiziuns da viver, per schurmetg general, perdunament e benedicziun. Il pelegrinadi dils Tuatschins ei ina perdetga fetg veglia d'in viadi collectiv da pelegrinadi dil Grischun a Santiago de Compostela. Ella muossa ferma pietad dil pievel, gronda unitad da cuminonza, la speronza da retscheiver grazia divina persunala e per la cuminonza dalla val. Il pelegrinadi signava l'expressiun d'ina ferma cardientscha e la gronda speronza en in temps malguess signaus da ferdaglias, raccoltas disgraziadas e malsegirtads. La confraternitad veva era ina funcziun sociala e quei noda pader Baseli Berther: *La confraternitad era stada fundada 1609 dils pelegrins stai a S. Giachen en Galizia ed aveva per intent da far bien per ils commembers suenter lur mort. Ina sort da segirada da veta pils restai anavos, oravontut vieuas ed affons. Ina buna caussa per da quels temps e la confraternitad ha giu gronda affluenza. E sorprendetamein ha era dunnas astgau daventar commembras.*
Anniversari da 1456.

1610

Quei onn ei nudada in'erupziun d'in cuolm "Eruptio montis anno 1610" tenor ina notizia dil plevon da Sedrun Sebastian de Casteberg. Per la fiasta da Sogn Gion Battesta, ils 23 da zercladur, ei sur Trun rut ora in cuolm ed ha, tras la pressiu d'aua, rut giu grondas massas da greppa e crappa. Entras quei ein praus, ers, casas e beins vegni cumpletamein donnegiai, aschia ch'igl ei restau nuot da quels.
Anniversari 1456.

1617

Gronda miseria da fein e consequentamein carischia da cumprar. Las miserias la primavera digl onn 1617 ein stadas aschi grondas cheu en Tujetsch, "ch'ils rehs ein i

sin las muntognas ed en igl uaul, han fatg naven la neiv e purtau da leu quei ch'els han pudiu." Silsuenter ei vegniu ina buna stad cun bia e bien graun . . . quei ha Bartolomeus de Rungs nudau, da gliez temps plevon a Sedrun.
Anniversari da 1456

1618-1639

El Grischun regian ils embrugls grischuns. Il plevon da lu en Tujetsch, Bartolomeus Derungs, Sedrun, descriva quei temps nausch egl anniversari. La descripziun vala pils onns 1618-1622. All'entschatta dalla descripziun metta el la cuolpa da tuttas disgrazias e miserias sin in comet cumpariu igl onn 1618. En verdad ein duront quei onn cumpari treis comets, il pli grond ils 25 da november 1618, in auter ils 25 d'uost ed il tierz l'entschatta november.

Aschia noda il plevon Derungs: Igl onn 1618, il december, ei vegniu vesiu in comet vid tschiel che ha sclariu biaras notgs sper las autras steilas naturalas ed ei staus visibels quasi en l'entira tiara. Quei comet ei vegnius interpretaus sco in signal da bia malsogna, uiara, revoltas, mort e scartezia. E veramein ein suandai onns cun biars grevs eveniments che han confirmau la predetga.
Anniversari 1456.

1621

«Igl onn 1621 ein vegni fatgs gronds tumults e carplinas denter ils catolics e reformai a Zezras, a Cuera, a Tusaun ed a Valendau. Leu ei culau bia saung, ed in grond diember da persunas ei vegnida mazzada; numerus spirituals e seculars ein vegni assassinai. Il temps da primavera, il meins da mars, essan nus catolics dallas tiaras sura vegni attaccai e persequitai dils luterans che eran sut nus. Nus essan vegni catschai ord nossa tiara e menai viers ils cunfins, giuven e vegl, dunnas ed affons. Els han destruiu nos beins, rauba e victualias. Mo pauc suenter essan nus returnai en nossas tiaras, suenter haver pituu gronds donns e grondas disfortunas.»
Anniversari 1456.

El terminescha sias notizias cun dar in'egliada sils daners e la valeta da quels:
«Il daner era lura en gronda abundanza e d'aula valeta. Mintga pauper um haveva sia buorsa plena. Ils rehs pudevan empristar libramein per in tscheins d'in flurin ad onn. L'entira tiara fuva vegnida corrupta, paupers e rehs han fatg grevs puccaus ed han cuglienau in l'auter.

Igl irom ed irom falliu (mesch) eran aschi cars e preziai, che las dunnas han priu las cazzettas d'irom per vender ellas ed ord quei irom ei vegniu battiu muneida. Tuts cumpravon irom per far muneidas.

Anniversari 1456.

Midada dallas cultiras

- *Garnezi*: Els aults fuva buca pli pusseivel da cultivar tut il carnezi. Perquei han ins cultivau pli bia segal e dumiec e pli tard (dapi il 18avel tschentaner) era truffels, ch'ei pli resistents encunter il freid. En Tujetsch ei l'emprema gada vegniu semnau truffels a Selva igl onn 1805.

- *Muvels*: Las alps fuvan in grond avantatg per la tratga da biestga: vaccas, cauras e nuorsas devan latg, caschiel, carn e curom. Caschiel, carn secca e buglia da graun ein d'aventai il nutriment fundamental.

- *Reservas da victualias*: Ils onns buns vegnevan ils products conservai (seccai, fimentai, ensalai) per survivor ils temps da fom.

- *Lavinas, bovas ed igl avanzament dils glatschers* han destruiu bia pastira ed uaul. Vitgs els aults, a sias uras fundai dils Gualsers, han stuiu vegnir bandunai ed ils avdents ein secasai giu el vonn dalla val. Aschia per semeglia: Caspaua, Planatsch,

Mulinatsch ed auters.

- *Survetsch da mercenaris*: Biars giuvens umens ein i egl exteriur sco mercenaris. In export essenzial el Grischun. Lur schulda ha gidau las famiglias da survivor.
- *Emigraziun*: Duront ils temps da direzia han entiras famiglias bandunau la patria per tscherchar ina megliera veta en autras parts dil mund. Mira igl onn 1628.
- *Corporaziuns e cuminonzas*: Ella val existevan alps communalas ch'ei duront decennis era vegnidas surdadas a corporaziuns. Ils biars uauls fuvan communalas, aschia che tuts habitonts vevan il dretg da guder. Quei ha rinforzau la solidaritad
- *Baselgias e capluttas*: La baselgia, la religiun, ha giu ina rolla impurtanta per la tgira e sustegn dils paupers. Ella menavan magasins da graun, parteva graun e sal ed organisava agids.
- *Lenna ed energia*: Ils uauls ein vegni duvrai intensivamein. Fiugs aviarts en cuschina e pli tard pegnas eran necessarias per survivor il temps freid.
- *Unviern*: Duront gl'unviern eran las famiglias isoladas; ins viveva duront meins mo da quei ch'ins haveva sin igl agen bein.

1622

Igl onn 1622 cumpara a Zarcuns Nossadunna a Gionet da Giuv. Ella giavischa da baghegiar gest en quei liug in sanctuari en honor da Nossadunna ed ella laschi per engraziament madirar il garnezi en Tujetsch. Ils Tuatschins e las Tuatschinas han priu serius quella appariziun e serendi mintga sonda avonmiezdi da Rueras e da Sedrun anora a Zarcuns ad in survetsch divin e recitar leu il sogn rusari. Quella tradiziun da tempru religiosa ha cuzzau entochen ils onns 1960 cu il traffic entras la construcziun dallas ovras hidraulicas fuva daventaus prigus.

La caplutta da Zarcuns viva aunc oz dalla historia dil **Gionet da Giuv** che veva da recitar in entir paternies duront siu viadi dad in'ur'e mesa da Zarcuns a Giuv, ni cuntrari. Sia oraziun era la recitaziun dil paternies cun meditar mintga plaid da quel. Il Gionet da Giuv ei staus ina persunas dubiteivla. Interessanta ei la notizia dil caplon egl urbari da Selva:

«*Il Gion Beer da Giuv vegneva da siu temps tenius, dad ina vart per in sogn e da l'autra vart per in stuorn. El eri ledis e dueigi haver giu ina visiun da Nossadunna a Zarcuns, schend che sch'ei vegnessi fatg firau la sonda suentermiezdi, vegnessi Tujetsch ad esser provedius cun paun. Cun cumprar e spargnar seigi el vegnius provedius ed ils smarschuns hagian giu fiasta. Sogn Paul di: Tgi che vul buca luvrar, vegn buca a magliar. Gionet da Giuv muossa a nus: Tgi che lavura buc, vegn a magliar. Tgi ha endretg? Umens da varga 80 onns han risdau quei a mi e mess vitier ch'ei seigi vegniu fatg ina brev da quellas varts, mo quella cuntegni aunc autras caussas ch'ins astgi buca schar veser ella.*»

1628

Igl anniversari da 1456 noda sut igl onn 1628: «*Ils 19 da settember ei stada ina ferma, spesso e sgarscheivla purgina sur l'entira tiara, gie sigl entir mund, aschilunsch sco ins ha pudiu udir. En in sulet di ein tut il graun, fein e fretgs schelai tochen sil tschespet. E quei pauc ch'ei restau anavos fuva daventaus nunduvreivels, ins saveva buca cuschinar. Ina gronda part dil pievel viveva in liung temps senza paun. Schizun ils rehs vevan negin paun ed oravontut ils pauper pitevan gronda fom. Biars bunamein murevan dalla fom. Ils pli paupers han stuiu prender glin, fein e strom e far ina frina. Els han sechenta, smacau e mulau ed han magliau quella frina scatschai dalla gronda fomaz. Ina part dalla populaziun stueva bandunar casa e clavau, vender il fatg per pauc daner e bandunar lur patria. Entiras famiglias, umens e dunnas e lur affons emigreschan quei onn ella Hollandia, a Vienna e Venezia. Da Tujetsch emigreschan 200 persunas.*»

Anniversari 1456, fol. 36a

La scheltira dil settember 1628 ei stada ina part d'ina perioda freida cun plirs onns da raccoltas nauschas, fomaz ed ina pestilenzas denter 1627-1630. Il schliet clima ei aunc staus rinforzaus dad erupziuns da vulcans en tiaras tropicas che han sferdentau l'atmosfera.

Ulteriuras cronicas d'autras vals dil Grischun nodan quella scheltira entras ina purgina tussegonta. Ella vegn pil pli era vesida sco in castitg da Diu ni era ina catastrofa dalla natira.

1618-1628

In dils pli vegls documents dalla litteratura populara romontscha anflein nus era en igl anniversari da 1456, numnadamein ils «Versets da striegn da Tujetsch». Els dateschan dall'entschatta dil 17avel tschentaner ed ein nudai dil plevon Bartolomeus Derungs plevon a Sedrun ils onn 1617-1628. Els secloman:

Diaus ha dau adinna dau duus, che vutten prender navenda et la chara bona sta. Sibilla et let a chara bona s.ta cilgia, ils chiars buns ss. treis regs, la chara bona s.ta trinitad, nies char sig.r Jesus Christus prendig navenda quei mal in num della bona s.a trinitad sfa poder sil fiet spirt turnar la sanadat.

Mava ina donnaetta per in plaun ora, topava nossa donna, nossa donna scheva, nuua uol ira ti donnaetta. R. Jau vi ira per medaschines incorir, mia vacca ei usci mal toccada. R. nossa donna, tuorna a casa ti donnetta, tia vacca ei uscia bein migliorada, quei seig entil nom del pader, filg et song spirt et ella uscia bein meg gliera, enten nom da Jesus quei fendi et et schlopi ora.

Tgei schai davos quels versets? Ei va cheu per anflar agid, “prender naven il mal” e “mia vacca ei aschi mal tuccada», per carstgauns e biestga. La glieud tuccada da miserias mava tiel plevon e lez fageva diever da quels versets, plitost oraziuns. Il pertuccau plazzava il maun sin quels texts ed il plevon recitava els cun devoziun perschuadenta, forse pliras gadas. La pergameina ei daventada tschuffa. Amiez la pagina ed agl ur dretg ei tagliau naven. Forse maunca schizun in verset ni ha quei toc tagliau ora schizun surviu sco amulet.

1635

Quei onn ei la pestilenza da biergnas arrivada ella tiara ed era en Tujetsch. Da quei temps ein 70 persunas mortas da quella sgarscheivla pesta. Plaunsiu eis ella arrivada tochen a Segnas. Quei lai dubitar che la pestilenza seigi vegnida sul Pass Alpsu. A Cuera noda il register dalla baselgia reformada 110 morts. Uestg Josef Moor ei quei onn morts dalla muria.

1637

La synopsis dalla claustra da Mustér, ina resumaziun da schabetgs, raquenta che la pestilenza da biergnas hagi giu liug en Tujetsch. Duront la pestilenza da 1637 ein 70 persunas mortas en Tujetsch enteifer cuort temps. Da gliez temps fuva ei mo in sulet spiritual ella val. Sin istanza digl avat Stöcklin da Mustér ha il prefect dils caputschins, pader Ireneus a Lontsch, tarmess il pader Amadeus de Mortara a Tujetsch per gidar duront quei trest temps ella pastoraziun. El sez ei vegnius tschaffaus duas ga dalla pesta, mo ei staus preservaus dalla mort. Il sulet pader caputschin che ha pastorau en Tujetsch.

Per ch'il Segner protegi da quella pesta ha Tujetsch fetg probabel decidiu da quei temps da far mintg'onnn per la vigelgia da s. Gion Battista, ils 23 da zercladur, ina processiun a Segnas tiels patrums gidonters encunter la muria: s.Bistgaun e s.Roc. Dapi 1905 ei quella processiun lu vegnida fatga il medem di a Zarcuns tiel sanctuari da Nossadunna e quei duront in tschuppel decennis. Ord motivs dil cuntinuau carschament da traffic cun autos sin via han ins entuorn ils anno sissonta stuii desister da quella processiun.

Dalla «muria dallas biergnas» igl onn 1637, raquenta pader Placi a Spescha ch'in cert Duri de Florin seigi era vegnius infectaus da quella pestilenza. El havevi ina gronda biergna. El ha lu tertgau tier sesez: «*Finiu eisi tonaton, mo jeu vi aunc mirar avon tgei tissi che quellas biergnas cuntengnan.*» In mument ch'ils da casa fuvan absents, ha el priu in cunti e fatg in ferm tagl ella biergna ord la quala igl ei flessegiau saung encugliau, aua ed ina specia da garnetschs sco panetscha. La plaga ei migliurada. Silsunter han plirs auters applicau il medem recept ed ein era mitschai.

Ina dunna dalla veglia schlatteina de Medell, ei fugida dalla pesta cun ses dus fegls schumellins sil mises da Cungieri sur Sedrun. Cheu han ins cattau ella morta. Sch'ella ei spussada ni ina unfrenda da l'epidemia, vegn buc indicau. Mo ils dus affons ruassavan vivs vid siu pèz ed ein restai sauns. In dils mats, il Conradin, ei daventaus 47 onns pli tard landrehter, l'auter sut il num Adalbert II in avat stimau da Mustér.

Era quella pestilenza ei serasada tochen a Segnas. Empau irritont ei il diember dad unfrendas en Tujetsch, ch'ei ton igl onn 1635 sco era 1637 da medem diember. Scadin cass ei ina unda da pestilenza documentada per Tujetsch ils onns 1637 e 1638. Igl avat da Mustér ha da gliez temps ordinau oraziuns, giginas e vuts. La pestilenza svanescha.

Quei ei stau la davosa gada che la pestilenza ei sederasada en Tujetsch. Suenter quei temps entscheivan quellas pandemias a svanir. Persuenter dat ei plirs motivs. Ils carstgauns datgan dapli dalla schubradad e fan quarantena. Loghens infectai vegnan bloccai ed il traffic da fiera medemamein ni strentgamein survigilaus. Carteivel ei era il virus Yersinia pestis semidaus ni piars il ciclus natural, denter auter entras la midada dil clima, Pign temps glacial", ni entras il svanir dils ratuns e plugls sco transmetturs. Aschia svanescha la pesta che veva furiau naven dil temps miez ell'entira tiara grazia a midadas socialas, climaticas e biologicas.

1648

Il rapport da visitaziun dalla pleiv digl onn 1648 remarca il suandont: Dalla baselgia parochiala sa il plevon passar sur in dutg per arrivar vi en casa pervenda a Dulezi. Onns suenter igl onn 1648 ei ina gronda bova sederschida dil Cuolm da Vi a val viers il Rein da Strem e giuviars encunter Gonda e Sedrun. L'aua da quei dutg ha silsunter formau in dutg, numnaus il Dargun, Run e Drun, ch'ei ius tut tenor forza e dimensiun inaga viers Sedrun ed autras gadas enviers Camischolas. Vic Hendry noda: "*Ed igl ei da supponer ch'ei seigi stau in sbuadetsch sgarscheivel. Schebein igl ei lezza ga ch'il Drun ei daus da Prau Strems engiu ed enviers Camischolas ed ha scarpau dapart la Tgamaura, gliez ei negliu dad endriescher. Igl ei schabegiau enzacu. E vinavon: Ils vischins da Gonda e Sedrun e da l'autra vart ils da Camischolas seigien vegni perina dad acceptar la proxima cuorsa dil Drun, seigi quella lu enviers Camischolas u enviers Salins e Pitgmun. Leu nua ch'el mondi, dueigi el restar per ina e per adina. E scochemai dueien ins graduar e far dallas varts uors da crappa grossa. Il Drun ei ius la proxima ga dalla vart da Sedrun e Gonda. E cheu eis el aunc oz, oz ch'el ha fatg in brav vau, in che contonscha en certs logs 12–15 meters ladezia ed ina profunditad da passa 8 meters.*" Ed il Run ei seformaus culs onns a

quei ch'el ei oz. Han las midadas climaticas e las permanentas plievias durant tschenteners menau a quella bova dil Cuolm da Vi?

1675

El 16avel tschentener han pliras undas da persecuziuns da strias tschaffau la Cadi. Catschau da miserablas raccoltas, da carischia, da fomaz, malauras, malsognas e tensiuns religiusas, ein surtut dunnas socialmein vulnerablas vegnidas sut suspect, mintgaton era umens. Las proceduras suandavan in model inquisitori:

denunziaziuns, interrogaziuns repetidas — per part sut tortura —, confessiuns sfurzadas ed in'extensiun sin conculpeivels. Tier ina sentenza culponta suandava savens la mort vid la fuortga ni sil scandler (crest da lenna) cun pusseivla confiscaziun da beins. Baselgia ed autoritads han tenor cass rinforzau il squetsch. Il resultat ei staus in clima persistent da tema e plagas socialas profundas, cun in eco che ha continuau fin il 17avel tschentener.

Igl onn 1675 ei stada la culminaziun dallas persecuziuns ella Cadi cun 28 persunas ch'ei vegnidas messas vid la fuortga. Ils 2 d'avrel 1676 vegn Ottilia Beer da Giuv prida a ferm, sentenziada e messa via. *“Da tgei malfatg ella ei stada denunziada san ins buca vegnir sissu. Igl ei da supponer che zatgi vevi fatg valer ch'ella seigi ina stria. – Durant l'inquisiziun denton han ils derschaders tuttina fatg persenn che l'Ottilia Beer da Giuv batti ils quarts e zatgi ha schau ir ella a casa»*, tenor Vic Hendry el cudisch Tujetsch 1987.

1645

Ils onns 1645–1715 senunman il temps dil Minimum da Maunder. Quel dessegna ina perioda da varga 70 onns cun activitad solara extrem bassa. Durant quei temps ein ils puncts solars struschamein stai visibels e quei sur decennis ora. Entras quei sesminuescha l'energia dil sulegl. Specialmein en l'Europa ed en l'America dil Nord ha quei, cun auters facturs ensemen, menau ad ina sferdentada marcanta cun unviarns fetg freids, glatschers che s'avonzan e flums gronds ein glatschai igl unviern. Il Maunder-Minimum corrispunda exactamein alla pli frestga fasa dil Pign temps da glatsch. El vegn consideraus sco in dils principals facturs che ha menau quei temps a temperaturas aschi bassas – rinforzadas aunc d'erupziuns vulcanicas ed auters facturs climatics.

1690

Ils onns 1690 ein en Svizra onns da «Gronda carischia» e cun bia unfrendas entras malsognas e fomazs.

1693–94

Quels onns s'audan tiels grevs onns da fomaz en Svizra. Ina seria da stads freidas e bletschas han menau a schliatas raccoltas, garnezi lavagau e carischia. En biaras cuntradas, era el Grischun, mieran carstgauns dalla fom, fleivlezia e malsognas. Quei temps ha retschiert ellas cronicas il num «gronda carischia».

Cardientscha e ferdaglia - il moviment religius e las sfidas d'in temps criu

Il 17avel tschentener ei caracterisau entras in immens moviment religius en nossa entira vallada. Enteifer quei tschentener vegnan buca meins che tschun capluttas construidas sin terren tuatschin e la baselgia da sogn Vigeli vegn reconstruida ed engrondida. Ha quei era da far cun la situaziun dil clima criu cun l'emprova da mitigar Diu, Nossadunna e tut ils sogns e rugar sin quella moda per megliers temps? Aschia vegn baghegiu:

- Igl onn 1609 vegn la caplutta da s. Leci construida en il Plaun a Cavorgia. Tenor la pietad populara vegn el veneraus sco protectur encunter malsognas.

- Gl'onn 1622 vegn la caplutta da Nossadunna a Zarcuns erigida e quei sin fundament d'ina appariziun da Nossadunna a Gionet da Giuv. Ella empermetta da schar madirar il garnezi ella val. Era quella empermischun stat tgunsch en connex culs schliats temps climatics.

- Igl onn 1630 vegn la caplutta a Selva construida en honur da s. Gion evangelist, s. Paul e s. Valentin. Tuts treis ein gidonters per certas malsognas.

- Entuorn gl'onn 1650 ei la caplutta da Giuv vegnida erigida en honur da s. Bistgaun, il gidonter encunter las pestilenzas.

- Igl onn 1679 vegn la caplutta a Surrein/Foppas baghegiada en honur da s. Antoni. Tenor la pietad populara protegia el carstgauns ed animals da malsognas e maluras.

- Gl'onn 1691 vegn la baselgia veglia da sogn Vigeli a Sedrun disfatga ed ei succeda la reconstrucziun ed engrondaziun che cuoza tochen igl onn 1703 cul plazzament dils treis altars digl artist Gion Ritz dil Valleis ed aunc suandonts. Sogn Vigeli, uestg dalla Italia dil Nord ei staus igl annunziader dalla cardientscha cristiana ellas Alps e vegn era veneraus sco protectur dils habitonts dallas muntognas.

Il motiv da quei basegns e la voluntad ed energia da baghegiar capluttas en plirs uclauns e vitgs ei carteivel era d'anflar ella reformaziun che regeva egl entir cantun. Pia ina reacziun, ina demonstraziun religiusa ni era ina ustonza enviers la reformaziun.

Tgei immensa prestaziun per ina vallada cun circa 700/800 habitonts en in temps da plitost fomaz e pupira! Tgei gigantic mussament religius da nos antenats! Cons daners e con suadetsch ha ina tala lavur custau allas generaziuns dil 17avel tschentaner. Senza dubi in mussament da lur ferma cardientscha. En consideraziun d'in pusseivel squetsch davart la baselgia.

In ulteriur mussament da quei moviment religius ein medemamein la fundaziun dallas differentas confraternitads en quei tschentaner.

- Igl onn 1609 vegn la confraternitad da sogn Giachen erigida ella baselgia parochiala da s. Vigeli. La confraternitad e sesligiada all'entschatta dil 19avel tschentaner.

- Gl'onn 1691 ei la confraternitad dil sogn rusari vegnida fundada en la baselgia parochiala e gl'onn

- 1703 la confraternitad dil sogn scapulier medemamein en la parochiala a Sedrun.

Il 17avel tschentaner ei scarts da documents historics tuatschins. Ils sulets documents avonmaun tractan tuts fatgs dallas numerusas alps tuatschinas. Ils onns 1609/1625/1629 venda la cuminonza da vischins las alps Cuolm Cavorgia, Plaun Pardatsch, Pardatsch, Cavradi, Maighels e Surpalits ad indigens u a cooperativas e puspei ils onns 1663/1664 cumpran ils vischins anavos las alps vendidas. En auters documents va ei pervia da dispetas che pertuccan las alps tuatschinas, en possess dalla vischnaunca, dalla claustra u privats.

18avel tschentaner, 1700–1800

Il 18avel tschentaner ha menau Tujetsch atras in temps da midada, denter miseria e nova stabilitad. Suenter ils onns da pesta e las persecuziuns da strias dil 17avel tschentaner ha la val plaunsiu anflau ruaus ed uorden. Cun la populaziun che crescha vegn era l'allevaziun da biestga intensivada. Il transit sul Lucmagn viers sid ha purtau veta e brat el territori cun numeruas commerciants, berniers e pelegrins che passan atras la val. La giuventetgna ei s'engaschada sco mercenaris

tier pussonzas jastras. Biars ein sepladi sco luvriers e mistergners ell'Italia e Germania per gudignar il paun da mintgadi.

Ils unviarns ein aunc stai dirs. Il clima dil Pign temps da glatsch ha schau crescer quei ch'ei stau pusseivel. Tuttina ein beins e vitgs carschi cun construir novas casas e praus e maghers ein vegni cultivai.

La veta religiosa ha marcau ferm il mintgadi. Els vitgs vegnan las baselgias emplenidas cun novs altars, maletgs ed autras devoziunalias che attestan entochen oz la ferma devoziun e pietad populara. La baselgia, la pleiv resta il center dalla veta sociala, purtada dalla cardientscha dalla cuminonza e dalla speronza sin megliers temps.

1708

Ils 21 da mars, ein Gion Rest Peder e Simon Oliva vegni ella lavina dadens il vitg Tschamut.

1709

Il schaner digl onn 1709 vala sco in dils pli freids meins ell'Europa dapi il temps medieval. En l'entira Europa centrala, era en Svizra e Grischun, han las temperaturas bassas dominau sur meins cun temperaturas fetg bassas. Flums sco il Rein, la Ròna e schizun il Lai da Constanza ein stai schelai. En las Alps han cronists rapportau da fontaunas glatschadas, animals morts en stalla e buots da vin ruttas entras il cuntegn schelau.

Las raccoltas digl onn 1709 ein stadas cumpletamein destruidas. Biars carstgauns han pitiu fom, fein e graun ein daventai nunpagabels. En las regiuns aultas, aschia era a Tujetsch eisi stau specialmein grev da survivor. Las reservas da rauba ein sereducidas, biestga carpentada dalla fom e la neiv resta tochen ditg viaden ella primavera. Igl unviern 1709 vegn numnaus en numerusas cronicas «La gronda ferdaglia» ni «Igl onn da glatsch». En plirs anniversaris ed autras fontaunas vegn nudau da grondas e terriblas cuvridas da glatsch e da tiara mudergiada da scheltira. La glieud ha interpretau quellas catastrofes savens sco castitg ni emprova da Diu – in segn che determinava tut la veta el val e regiun.

Quei onn ei staus in dils pli freids onns dils antecedents tschenteners ed appartegn ad in dils pli extremists unviarns digl aschignumnu Pign temps glacial.

1718

Emprema dumbraziun dalla populaziun tuatschina: 832 habitonts.

1719

Ils 10 da schaner ein duas femnas da Selva, Catrina da Vienna e Maria Margareta da Vienna vegnidas ella lavina ellas Vals.

1730

Ils 31 da mars ei Martin Rumias Curschellas vegnius pella veta entras ina lavina a Vidauas sper Tschamut.

1736

Ils 26 da schaner, ei Giuliana Schrefer da Tschamut vegnida tschaffada dalla lavina en la Val s. Martin e suenter dus dis cavada ora morta.

1744

Barschament parzial digl uaul da Surrein entras il cametg.

«Am 6. Juni 1744 schlug in Tavetsch, im Wald Surrein, ein Blitz (Donnerkeil) ein.

Dabei wurden mehrere Tannen verbrannt und viele weitere durch das Feuer beschädigt. Den

daraus entstandenen Brand konnte man nur mit grosser Mühe löschen.»
Anniversari 1456

1749

Rapport dalla lavina da Rueras da 1749 egl anniversari dalla pleiv da 1456:
«Gl'onn da naschientscha da nies Segner Jesus Cristus 1749, ils 6 da fevrer, ei capitau in eveniment terribel e lamentabel ella pleiv da Tujetsch. Durent quei unviern veva ei per l'entschatta da quel neviu sco ordinari; suenter ha ei pluiiu suren e cuort suenter ina ferma purgina. Quellas cundiziuns han cuntinuau e menau a numerusas nevadas senza interrupziun, aschia ch'il pievel ha giu gronda tema. La damaun dils 6 da fevrer, ha la Vallatscha dau in segn da preannunzia dalla situaziun e sia lavina ei vegnida giu e si encunter Rueras, buc senza donn e tema. La sera dil medem di ei il vitg vegnius attaccaus dallas lavinas dallas duas valladas Pulanera e Mila e quei cun tala forza e sgarscheivel buf, che 23 casas cun 46 fiugs, 33 truaschs, 39 stallas, cun 237 animals, sco era 5 mulins ed ina resgia, ein vegni schubregiai naven e cuoretgs dalla neiv. La pli gronda disgrazia ei stada che pli che 100 persunas, giuvnas e veglias, ein vegnidas sut la lavina e denter quellas ein 44 carschi e 20 affons morts. In'ura pli tard – ei era circa mesa las endisch – han ils vischins udiu il grir e lamentar. Il plevon Giacun Biart, pleins fadigia per sias nuorsas, ei currius per dar agid cun auters umens. Mo cura ch'el ei arrivaus sper Zarcuns, ei era ina part da quei liug vegnius cuoretgs dalla lavina da Londadusa. Leu ha il plevon, per carezia da siu pievel, sacrificau sia veta, ensemen cun tschun autras persunas. Requiescant in pace. Quel che ha scret quei rapport supplichescha il bien lectur da rugar per las olmas – in Babnos ed in Ave Maria – per lur pasch eterna. Ils numms ein registrai el cudisch dils defuncts dalla pleiv da Tujetsch e ch'il Segner fetschi ch'els seigien era secrets el cudisch dalla veta.

Giachen Antoni De Gonda, plevon.”
Anniversari 1456

1751

Igl anniversari da Tujetsch noda: «Gl'onn 1751 ei staus in fetg freid cun ina primavera fetg tardiva, aschia ch'ins veva en Tujetsch grond quita ch'il graun vegni buc a madirar sil proxim atun. Plinavon era in prighel da malsognas armentivas, perquei che tut las vischnauncas vischinontas eran mudergiadas da malsognas dil muvel. Ils 2 da fenadur ha perquei giu liug in processiuun sollemn tier la baselgia da pelegrinadi a Nossadunna dalla Glisch a Trun. Il medem onn ein vegniu repartiu alla populaziun gratuitamein rodund 6000 sters graun».

Anniversari 1456, fol. 25.

1768

La dumbraziun da quei onn ei per l'emprema gada fetg detagliada. Ils habitonts vegnan dumbrai en mintga vitg tenor umens, femnas ed affons, il geniturs cun prenums e schlatteinas, denton senza ils prenums dils affons. Enqual remarca dat magari dapli sclariment. La val dumbra quei onn 888 habitonts; 439 umens, 449 femnas e 27 persunas fuvan absentas. Quella lavur da dumbraziun ei vegnida fatga dil plevon da Sedrun sur Giachen Antoni de Gonda ils 19 d'october 1768. Las cefras da mintga vitg ein interessantas:

Tschamut	67
Selva	95
Giuv	21
Rueras	212
Zarcuns	23
Camischolas	77
Salins	27

Gonda	64
Sedrun	136
Bugnei	46
Nacla e Canadal	18
Foppas	19
Surrein	35
Cavorgia	17
Il Plaun	8
Cavorgia Sura e Nislas	20

Las femnas domineschan cun in diember da 449. Lu dat medemamein en egl la gronda populaziun a Ruerascun 212 habitonts. Gonda, Sedrun e Salins ensemen dumbran 227 habitonts. Smarvigliar far era la gronda populaziun da Dadens gl'uaul, Selva e Tschamut, cun total 159 persunas en 33 fiugs.

Da quei tschentaner naven eisi pusseivel da far in maletg dil svilup dalla populaziun tuatschina.

1780

Ils glatschers s'avonzan massivamein. Il pictur tudestg Caspar Wolf (1735-1783) muossa cun ses dessegns a moda impressiunonta ils glatschers svizzers s'avanzai che fan tema.

1782

Val Gierm

Ein Fall von einer Schneelauine fiel im Thal Gierm um das Jahr 1782 vor. Man pflegt das Bergheu in Tavetsch am Ende des Sommers abzumähen und an einen Haufen zu legen, damit man dasselbe beym guten Schlittweg im Winter nach Haus führen und verfüttern könne. Als der Hornung (Februar) vorüber war, giengen 4 Männer nach dem Thale Gierm, um das gesammelte Heu an der westlichen Seite dieses Thals unter dem Berg Vanatsch zu entführen. Als sie das Heu in Stricken gebunden hatten, riß sich die Schneelauine los, ergriff die Männer samt einem Bären und lieferte alle der Ewigkeit ein. Einer davon, der die Losreißung des Schnees gewahr wurde und sich auf das Angesicht geworfen haben mußte, ward auf der Stelle erdrückt; und die übrigen samt dem Bären, der vermutlich an diesem Unglück Ursach war, wurden bis in die Tiefe des Thals hinabgeschleudert. Man beweinte diese Männer als Väter vieler Kinder, den Bären aber beweinte niemand.

Pader Placi a Spescha

Ils tschun umens vegni ella lavina ils 23 da mars 1782 ein stai: staltal Sep Maria Beer, Gion Casperin cun ses dus fegls Gion Flurin e Sep Maria e Gion Antoni de Pelly. Ils tschun paternos suenter la s.messa a S. Leci a Cavorgia ein vegni recitai decennis mintgamai per quels tschun umens, vegni per la veta en quella lavina.

1785

Dil barschament dil vitg da Selva da 1785 ei pauc enconuscent. Onns ei vegniu detg e raquintau da generaziun tier generaziun: «Igl entir vitg ei barschous, deno la petga dil begl.» Egl anniversari san ins mo leger: «Am 20. Oktober 1785 ist das ganze Dorf zu Asche geworden».

Il schotgavel tschentaner va alla fin cun in grond moviment revoluziunar e guerril ella entira Europa. La revoluziun franzosa che sespleiga lunsch naven da Tujetsch lai tuttina anavos grevas plagas ella val. Ils Franzos arrivan en Svizra e traversan era nossa val.

1799

Ils Franzos ella Val Tujetsch

Sper la situaziun climatica succeda ussa la pli gronda disgrazia che ha tuccau nossa val e Sursassiala. Las raschuns ein d'anflar ellas relaziuns politicas turbulentas da quei temps, mo era en reacziuns nunponderadas dils responsabels en nossa regiun, sco er ella tenuta dalla baselgia. Il passadi dallas truppas franzosas e russas, ensemen cun la preschientscha dils Austriacs, ha purtau grevas consequenzas ed ha frenau il svilup suenter igl onn 1800. Perdetga da quella situaziun dat in document d'aula valeta: il register dils quens d'uiara da 1799, conserva us egl archiv communal.

In'egliada sils eveniments da quels onns

Gia ils 18 d'october 1798 ha in schischuri regiu ella Cadi, pertgei che la tschontscha fageva la currella: Ils Franzos vegnan sul Cuolm d'Ursera. Il di avon ei in um da Tschamut turnaus dad Ursera culla nova ch'ils Franzos seigien arrivai leu per rumper en ella Surselva. Els hagian postau lur avonpostas ellas hettas sill'Alpsu. La sera ei quella nova arrivada tochen ella capitala dalla Cadi, a Mustér.

Ils Austriacs havevan gia daditg fatg amogna agid encunter ils Franzos. L'invasiun dallas «truppas dil Kaiser» ei suenter quella nova d'aventada realitad. Gia ils 20 d'october ei ina cumpignia schuldada austriaca dil regiment Brenchaiville s'avanzada entochen ella Val Tujetsch. Ussa stevan las truppas dil «Kaiser» e dalla «Tricolora» sill'Alpsu ina siper l'autra. Il prighei d'ina uiara fuva aschia acuts. Da leu anora ha quella gruppa examinau las vias ed ils trutgs da Tujetsch e Medel. Plinavon ei ina cumpignia da catschadurs che secumponeva da burgheis dalla Cadi vegnida tarmessa sill'Alpsu e sil Crispalt per sustener la schuldada austriaca.

Vesend la republica franzosa las alianzas e preparativas d'uiara da vart dall'Austria, ha ella vuliu prevegnir all'attacca. Igl inimitg s'avonza ella Val Medel e rumpa era en ella Val Tujetsch. Cun 1500 umens ei general Loison vegnius ils 6 da mars 1799 enten catschar dis sur l'Alpsu ed ei daus encunter l'emprema resistenza a Sumsassi, endadens Rueras. Guglielm Gadola raschuna detagliadamein dil schabetg en nossa val. Ils emprems Grischuns che hagian engartau ils Franzos seigien dunnas da Tschamut stadas, ellas seigien fugidas aschi spert sco pusseivel encunter Rueras. Onna Catrina Riedi, ina dunna ch'era s'enterdada, hagi observau ils Franzos, mirond atras las sgremas d'in clavau. Da siu lagugn anora hagi ella schizun dumbrau il diember dalla truppa, biebein 1000 umens. (Decurtins plaيدا dad 800, Condrau da 1500 schuldada.) Durent il passadi hagian els perfin sittau e tuccau il zenn dalla caplutta da Selva. In giuven da 18 onns, il Giachen Martin Berther da Camischolas, ch'era blessaus en ina comba, ei vegnius sittaus giu. Austriacs e Tuatschins han battiu sco liuns, mo suenter il valerus cumbat han els stuii ceder alla surforza dils Franzos. Dapertut nua ch'els anflavan ina buna posiziun han els encuretga da retener ils Franzos. La Val Tujetsch ei vegnida en possess dils Franzos ch'ei stai ni crets ni maneivels. Els han rut en en las capluttas ed era ella parochiala a Sedrun, scarpau si leu il tabernachel, engulau il cibori e fiers las hostias giun plaun. Silsuenter han els fatg ina viseta al plevon Vigeli Venzin e cattau leu in Degonda ed il caplon da Rueras. Els han sblundergiu l'entira casa ed han sfurzau ils umens avon il clavau da Mira, nua ch'els ein vegni mess vi. Aunc oz dat ina crusch da l'enn perdetga dil mazzament sin la casa d'Emil Schmid-Beer. Era a Bugnei han treis purs stuii schar la veta, il Hans Gieri Monn, il Placi Monn ed il Gion Battista Sialm da Segnas. Cura ch'ils emprems posts franzos ein arrivai a Mumpé-Tujetsch, ei l'entira Cadi vegnida alarmada.

Suenter quellas novas ord la Val Tujetsch ei il cussegl d'uiara serimnaus ed ils umens ein sepinai. Suenter la discussiun cun in officier han ins luvrau ora il project da defensiun ed il liug, numnadamein Mustér. La battaglia a Cons ei stada ina mazzacrada terribila che ha custau la veta a biars, da mintga vart. Enderschend Loison dalla terrada, eis el seretratgs cun sias truppas encunter Tschamut. Ils purs furius han persequitau ils Franzos tochen sil Cuolm d'Ursera, tgi dil maun da Tschamut, auters dalla vart da Tiarms. Sper il lag ha ei dau ina nova mazzacrada, leu nua che plirs Franzos ed entgins dils alliai ein curdai. Sinaquei ei il rest dall'armada franzosa seretratga ad Ursera.

Suenter quellas lutgas han ils Franzos buca dau triev. Cun general Demont ei denton ina nova truppa rutta en ella Cadi per far vendetga per lur camerats. Entras contribuziuns ha la vischnaunca da Mustér stuiu far bien per ils donns caschunai. Cunquei ch'ils da Mustér ein selamentai dil sblundergem, ei la glieud da Tujetsch segidada sin basa finanziaria, sco era cun maglias per la schuldada ed ils cavals. Per la furniziun dil paun han 20-30 purs tuatschins transportau mintgadi frina sul Cuolm d'Ursera, quei fatg vegn era menziunau da Berchter. Ils vischins da Medel hagian giu ruaus en quei grau, selamenta Berchter.

Ils 25 d'avrel, cura che bun'aura ei rutta en, savevan ins buca retrer frina pli digl Uri. La conseguenza ei stada quella che cumissari Hardeville ha mess maun vid la semenza dalla claustra. Aschia stueva la populaziun trer vi la schuldada che veva priu quartier en nossa tiara. En in plan han ils contemporans planisau la vendetga sigl emprem da matg 1799. Quei di, suentermiezdi, han ils Tuatschins attaccau las postas dils Franzos. Igl officier ha buca ughegiau da far resistenza ed ei sesurdaus ensemblamein cun sia schuldada. Suenter quella nova ord la Val Tujetsch ha l'attacca priu si'entschatta a Mustér. La sera dil medem di ein ton Mustér sco era Tujetsch stai liberai. Ils perschuniers franzos ein vegni teni a ferm, gl'emprem ella Casa cumin e silsuenter ein tuts vegni sturni. La puraglia fuva segira dalla victoria.

Nunspitgadamein ein ils Franzos turnai ed han fatg ina vendetga sgarscheivla. Igl eveniment il pli snueivel ei bein staus il barschament dil vitg da Mustér e dalla claustra cun tut ses scazis. Suenter quei act da vendetga ei la posiziun d'uiara seviulta malamein. Ils Franzos ein seretratgs per schar entrar ils Austriacs.

Igl uost dil medem onn ei ina armada russa sut la direcziun da Suworow marschada tras nossa val.

Aunc oz va la fama dils Franzos en Tujetsch, buca tut quei ch'ins pretenda ei ver, sco per semeglia: Il clavau dils Franzos sil «Plaun dil Saltè» dadens Rueras ei enconuschents a tut ils Tuatschins. Che quei schuldau designaus sil pilaster ei buca in Franzos, gliez san buca tuts. Igl onn 1864 ha in Hitz schau ereger quei baghetg. Dil trup da luvriers ha in giuven talian fatg part. El vegneva numnaus «bueb da mauta». Quel vevi habilitads specialas da malegiar ed in'ambiziun tut speciala per Garibaldi. Cura ch'il clavau seigi staus baghegius a fin, hagi el dumandau il possessur, schebein el astgi designar in Garibaldian sil pilaster che miri encunter sid. Ella tradiziun ei quei Garibaldian sefitgaus sco schuldau franzos.

En mintga cass ein las regurdientschas dil temps dils Franzos idas d'ina generaziun a l'autra, l'influenza dalla revoluziun franzosa ei secatschada tocca el davos encarden.

Aunc el 20avel tschentaner cuschentava e smanatschava beinenqual mumma dalla Cadi in affon bargialer culs plaid: "Ils Franzos vegnan".

Cudisch da Tujetsch 1986, resumaziun ord la lavur da M. Manetsch-Berther, Trun

L'emprema mesadad dil schenivavel tschentaner, 1800–1850

Il benedictin e perscrutader dallas muntognas Pader Placi a Spescha ei staus in dils emprems alpinists e piunier dil turissem. El ha observau e documentau cun exactadad il vegnir pli freid ellas Alps.

En siu tractat digl onn 1818 cun il tetel «*Il clima dallas Alps alla fin dil vegl ed all'entschatta dil niev tschentaner*» fa el la resumaziun da sias observaziuns da 35 onns (1783–1818).

El s'exprima: "Il clima en las Alps svizras ei semidaus marcantamein dapi l'entschatta dil 19avel tschentaner. Las stads ein daventadas pli cuortas e pli freidas, ils unviarns pli liungs e cun nevadas. Anteriuras pastiras alpinas che fuvan pli baul en flur e suleagl ein ussa cuvretgas da neiv e glatsch, biars uauls ein vegni pinai ni morts giu. Ils glatschers ein carschi e seruschnai giu en las vals – era en la Surselva ed el territori dil Pass dil Lucmagn. Il Péz Muraun ni il Scopi, che flurevan tocca sum e cun pastiras en fluriziun ein ussa cuvretgs cun neiv durant igl entir onn. Era ils laghets d'alp en la regiun da Maigels e Cadlimo ein cuvretgs cumpleinamein da neiv e glatsch».

Spescha interpretescha quellas midadas sco in segn d'in clima permanent pli freid, ch'el attribuescha a process naturalis dalla tiara: Las mars che sesbassan e l'alzada dallas muntognas han exponiu las Alps pli ferm alla ferdaglia. Aschia ein las massas da neiv e glatsch carschidas, ils uauls sesbassai e las pastiras sereducidas.

Cun sias observaziuns ha Spescha furniu ina descripziun fetg exacta dil «Pign temps da glatsch», d'ina fasa freida per la fin dil 18avel tschentaner e cuntinuond.

Siu rapport digl onn 1818 ei aschia in dils pli vegls documents climatics dalla Surselva, ed el muossa cun impressiun co las personas dallas Alps vevan gia lu fatg persenn la forza dil clima.

Resumau di pader Placi a Spescha: Ils glatschers creschan, ils uauls vegnan pli pigns, las pastiras sesminueschan e las vals vegnan pli freidas.

En: Pater Placidus a Spescha - Sein Leben und seine Schriften Hager/Pieth, cumpariu 1913.

1806

Ils 19 da fevrer, mesjamna dalla tschendra, ei la lavina vegnida giu dalla Val da Plaun sur Selva entuorn l'ina dil di ed ei ida cun ina casa dubla gronda, nua che la glieud eran per ventira fugi ual avon pign mument. Era in clavau dado baselgia cun enzacons tiers manedels ei vegnius sfracaus ensemen. Cun ils tiers gronds fuvan ins untgi ora il di avon.

1806

Pader Placi a Spescha e Tujetsch

Pader Placi a Spescha descriva la Val Tujetsch igl onn 1806. Quella descripziun dat perdetga dil viver el 18avel tschentaner en nossa vallada. El sez enconuscheva fetg bein las relaziuns en Tujetsch, ha el gie pastorau plirs onns a Selva e Sedrun. El ei era staus in dils emprems alpinists e turists cheu tier nus. Plinavon ha el rimnau ed anflau biala e preziusas cristallas e minerals. Igl onn 1785 ascenda el il Pez Badus, 1792 il Pez Ault, 1793 e 1812 il Pez Tgietschen ensemen cul plevon sur Giusep Hitz ed il caver, 1804 il Pez Giuv ed aunc auters cuolms da nossa vallada el decuors da sia pastoraziun ella val.

En sia considerabla lavur da varga 900 paginas descriva el l'economia, la politica, l'agricultura e cultura ed auter bia dalla Val Tujetsch. Denter tut quei descriva el era il carstgaun tuatschin e metta veramein accents singulars:

«Quei ch'il diamant ei denter las cristallas ed igl aur denter ils metals, quei ei il carstgaun denter las creatiras viventas. Partenent la schlattaina humana sai jeu dir dils Tujetschins e

quei senza far il leischen, ch'els seigien il pli bi raz de tuts ils habitonts dellas alps. - Da natira ein els veramein biala glieud, ed han, surtut en lur giuvens onns, ina colur sco latg e vin. Tiels carschi svanescha beinduras quella bellezza naturala, essend ch'ins dat memia pauc adatg silla schubradad dils affons, ins siara en els memia ditg ellas faschas, arva mai si las finiastras e fa mo de rar, ni insumma mai bogn cun els. Ils umens ein mediochers da statura; mo paucs mesiran sis peis e dapli. Els ein fermes, bein proporzionai e bials da statura. Sch'els umens de Tujetsch purtassen vestgadira empau meglier fatga e colurada e sch'els scultressen in tec ils cavels e schessen tagliar la barba, lu fussen ei stupentas cumparsas. Las femnas ein generalmein bein carschidas e gradas sc'in conio, lur fatschas ein amureivlas ed ellas han ina colur sco latg e vin, ellas han liungs e bials cavels mellens. Lur cuntut ei spèrts e grazius; lur tschontscha lingiera e viva. Las bialas e frestgas mattauns setilan bugen el dumiesti ed in proverbi di: *Ins sa mai nua las mattauns ed ils cavals laian lur ossa. Ei sedi ch'enteifer 70 onns seigien bia mattauns maridadas ord vischnaunca e purtau ord la val in capital de varga 100'000 flurins, circa 175'000. - frs.*»

Pader Placi enconuscheva memia bein ils prighels che smanatschavan giu dils aults. Quei ha menau el tier in plan straordinari. El enquera in liug centralisau e segir da tuts prighels en tuts graus. Quel anfla el a Salins, el liug nua che la staziun dalla viafier sesanfla oz. Cheu deva ei dar in vitg per l'entira populaziun da Dieni tochen Bugnei. El noda: *«Wenn ich Befehlshaber von Tawätsch wäre, müsste hier ein allgemeines, regelmässiges und wohlgebautes Dorf gleich einer Stadt gebauet werden»*. Siu vitg, quasi in marcau, skizzescha el en fuorma d'in rombus. Sulettamein la baselgia e la casa pervenda duein restar el liug vegl. Il medem project veva el pil vitg da Selva ch'el leva era reconstruir da niev.

1808

Pader Placi a Spescha dat in rapport dalla lavina dalla Val Ruinatsch igl onn 1808, ils 13 da december:

Die sehr ausgedehnte, tiefe und abschüssige Thalseite des Ruinatsch brach los, jene von der sogenannten Benaus ebenfalls mit: beyde Lauinen stürzten sich mit donnerndem Gebrülle in die Tiefe des Rheinbettes, erhoben sich wegengewalthätiger Zerschmetterung, Anprall, neuerdings über das bey 100 Klafter erhöhte Ufer des Rheins; die letztere Lauine gab der ersteren eine unnatürliche Wendung gegen Nordosten; beyde gewannen die oben genannte Ebene, überfuhren sie, griffen gemeinschaftlich das Dorf von Südwesten an, zertrümmerten und begruben alles, was ihnen im Wege stand, nahmen den Thurmknopf von der Kirche sammt dem Kreuz und die Dachschildeln von den Gebäuden mit, stäubten und schleuderten alles bis zur Waldung ob dem Dorfe hin. 6 Häuser wurden zertrümmert, eines stark beschädigt und ein anderes des Daches beraubt. 5 Ställe sind vernichtet und müssen neu gebauet werden und nur zwey blieben unbeschädigt. 42 Personen, folglich die Hälfte der Einwohner, und ein Kind im Mutterleibe, 25 Tote, 37 Stück Rindvieh und ungefähr 200 Stück Schmalthiere lagen unter den Trümmern der Gebäude.

1808

Zu eben dieser Zeit, Dezember 1808, riß sich eine Lauine unter dem Berg Quolm de Vi ob Salins im Tavetscherthal los und überstürzte in Valtgeva 7 mit Futter angefüllte Viehställe, wo nie Lauinen zu begegnen pflegten. Unweit dieser Gegend brachen zwey andere Schneelauinen los: die einte riß in Sedrun, im Hauptorte Tavetsch's, ein Haus ein, und die andere deckte einen Stall und eine Schmiede zu. Auch diese Lauine war unerhört.
Pater Placi a Spescha

1808

Il di suenter la processiun da s. Marc, ils 22 dad avrel 1808, ei curdada ina neiv da 4 cubics (?) ch'ins vesa darar, entras la quala l'usitada processiun dils Medelins e

Tuatschins per la fiasta da sogn Marc ei stada impedida. Ils Tuatschins ein denton – malgrad ina fetg schliata via, arrivai a Mustér.
Acta Capitularia 1799–1813, pag.105

1809

Diese und das Jahr 1809 waren für die Landschaft Disentis wegen den Schneelauinen schreckvolle Jahre. In der Churerzeitung vom 2. Jänner 1810 wird der Selver Schneelauinen vom 31. Christmonat des vorigen Jahres gedacht. Herr Bernhard Otto beschreibt die Umstände derselben sehr genau. Er fügt bei: 500 Schritte gegen Südwesten wäre eine sichere Stelle für das Dorf Selva und wäre zu wünschen, die Einwohner würden unterstützt. In Prau Mulins stürzte die Lawine 3-4 Ställe um.

1809

«Igl onn 1809 ils 31 da december ei stau ina notg ed in di da tema e da horrur per Selva. La cufla ha entschiet la sera avon da haregiar, cuflau tutta notg ed entuorn las tschun dalla damaun vegn la lavina da Tschenghels da Rusas e rumpa en la casa entadem il vitg, la preit sisum da quella dil maun dadens ed igl esch dado da tschaler ed empleniescha en cun neiv. Sut casa ein dus clavaus fretgi en, rut portas e lenna ed empleniu en cun neiv, ed il tierz fretgs encunter cun neiv. Sur la casa dalla pervenda ora ei ida la lavina tgulond e zaccudend la casa. Suenter messa gronda, allas dudisch, durent ch'ils umens da Tschamut eran en casa pervenda per prender resti dil beneficiat dad ir a Tschamut, vegn la lavina dil Ruinatsch, siglent'en las finiastras dalla casa ora giudem dil vitg sut il clavau dalla pervenda e dadens dus eschs nuegl. Tschella lavina bett'en ina talina e questa in chischner e spuorla sin las finiastras dalla casa dalla pervenda bien e ferm e stgira la stiva.»

Quella notizia sesanfla egl urbari da Selva ed ei suttascretta: «Pader Placi, viu cun mes agens egl. Hai scret e sun serendus a Tschamut aunc quei medem di.»

1809

Il schaner, ein dus fermes umens vegni mazzai dalla lavina gest dator il vitg.

Senza saver dar en il datum ha pader Baseli Berther aunc anflau suandonts schabetgs da disgrazias a Selva:

- In cert Rest Riedi ei vegnius per la veta dator Selva entras in crap ruclont.
- In Balzer Riedi ei daventaus l'unfrenda d'in squatsch lavina ed ha anflau la mort ella Bullatscha.
- In Schnoz cun aunc in auter ein vegni ella lavina dadens Carmihut. Lur baras han ins anflau per la primavera.

1809

Der letzte Tag im Jahre 1809 war für Selva wiederum ein schreckvoller Tag: um 5 Uhr Morgens riss sich eine Lauine von mitternächtlicher Seite her, riß ein Haus, worin zwei Familien schliefen, und zwei Viehställe ein und richtete einen nicht unbeträchtlichen Schaden an. Wenn in den Küchen, auf den Heuställen oder in der Umgebung was Lebendiges sich eingefunden hätte, würde es des Todes gewesen seyn. Ungefähr hundert Schritte östlicher dem eingerissenen Hause liegt das Pfrundhaus (Spescha's Wohnung). Im nemlichen Augenblick, als jene Lauine sich losriß, brach eine andere ob dem Pfrundhaus ab und hielt sich nur ungefähr 100 Schritte ob demselben auf. Der vor sich getriebene Windstoß pffiff über das Pfrundhaus hinaus und erschütterte es so als wenn es von einem heftigen Erdbeben erschüttet würde! Um 12 Uhr des Tags, als der Gottesdienst vorüber war, kamen die Tschamuter in das Pfrundhaus, um mich nach ihrem Orte zu begleiten. Indem ich mich zur Abreise anschickte und die übrigen von Tschamut sich in andere Häuser Selvas begeben hatten, gieng eine andere auf der entgegengesetzten Seite des Thals losgeschälte Lauine wie vor einem Jahre herab, warf erstlich eine Kornleiter um, rieß Thüren und Fenster der

entgegenstehenden Gebäude samt den Dächern ein und besprengte alle Häuser und Ställe mit Schnee. Die 12te Stunde des Tags schien die 12te der Nacht zu sein, und alles, erwartete diesen Augenblick als den letzten seines Lebens. Nun weiß ich, wie es einem ist, wenn er auf dem Mittelpunkte des Lebens und des Todes steht. Ich trank gleich den Kaffee und gieng ab. Ich bemerkte nichts in meinem Körper als eine kleine Zitterung an meinen Händen beym Trinken, und die Reise, die ich vor mir hatte, war gefahrvoll. Die Südseite, von welcher diese Schneelauine sich losstürzte, beträgt in der Breite ungefähr eine Viertelstunde und in der Länge um die Helfte mehr. Das rhätische Wort Ruenatsch bezeichnet einen Berggiebel, der auf der anderen Seite des Rheinthales, rechtsufrig, dem Dorf Selva Mittag gegenüber liegt; dies heißt im Deutschen: der grosse Fall; und von diesem Gipfel an stürzte sich der Schneefall, Lawinenzug. Vom Rheinbett bis in das Dorf beträgt die sanft aufsteigende Flächenbreite ungefähr 400 Schritte. Der Süd- und Westwind bliesen schon am Abend vorher und die ganze Nacht hindurch sehr heftig, stießen Wälle von Schnee zusammen und verursachten der Fall. Wenn der Schnee wie vor einem Jahr 3 Ellen gewesen, wie er dies Jahr nur 1 ½ Ellen tief gelegen, so würde alles des Todes gewesen seyn. Das Dorf muss 500 Schritt südwestlich versetzt werden. Ich geharre empfehlungs und achtungsvollst

P. Placidus Spescha, Beneficiat. Selva den 2tem des Jen, 1810.

1810

In der Woche nach Segagesima, den 17. bis 19. Februar, war hier eine seit Menschengedenken noch nie dagewesene Kälte, Guter Wein gefror in den Fässern. Den 25ten fieng die Kälte an sich zu verlieren. Es warf einen mittelmäßigen Schnee; sodann fiel eine sehr warme Zeit ein, die bis heute andauerte. Gestern um 2 Uhr morgens blitzte und donnerte es sehr heftig. Der älteste Mann hier, Julius Udalricus (Gili Duri) Riedi de Tschamot, ein 76jähriger Mann, kann sich nicht erinnern, dass sich derartiges ereignet und so leichtes und unreifes Korn gegeben habe, wie im verflossenen Jahre. Der Teig, den ich aus Gerste und Roggen backen ließ, war grünlich gelb; allein das Brod war dennoch essbar.

Selva, den 15. März 1810, Pater Placi a Spescha

1811

Heuer ist ein gesegnetes und um einen Monat früheres Jahr; es war ein fruchtbares Jahr für Tavetsch: viel Heu und die 10fache Vervielfältigung der Frucht. Um St. Joh. Baptista fiel ein Schnee - und deckte die Saat bis Sedrun; selbe erhob sich aber wieder.

Pater Placi a Spescha

1812

Die Selver behelfen sich mit den Nitschuns, die sie im Thal Curnera sammeln; denn die Heunoth war gross. Das Klafter Heu galt anfangs 6-7-8-9 endlich 14-18 bis 20 Gulden. Unter „Nitschuns“ verstehen die Talbewohner das nicht gemähte und somit unter Schnee. Druck überwinterte Berg- und Wildheu der Mähder und Wildheuplanken, das in Zeiten großer Heunot erst im folgendem Frühjahr gesammelt und verfüttert wird.

Das Jahr 1812, Pater Placi a Spescha

1813

Ils 12 da settember 1813 essan nus arrivai en nies desiart (Desertina/Mustér), pader Sigisbert Frisch cun ils dus fras Adalbert ed Anselm returnond da Lucerna, staunchels dalla via, perquei che nus essan stai impedi dad aulta neiv sin il Cuolm d'Ursèra. Sigl ault dil pez dil cuolm havein nus entupau dus cadavers, numnadamein dil Landaman d'Arms e d'ina femna dalla pervenda da Sursaissa, ch'ei vegni sfundrai d'ina lavina el lag ed han smisereivolamein piars la veta.

Acta Capitularia 1799–1813, pag. 171

1815

Gigantica erupziun dil vulcan Tambora ell'Indonesia. Per consequenza da quella daventa igl onn 1816 igl «Onn senza stad» ed ils suandont «Igl onn dalla fom».

1816

Sehr nasse und nicht selten kalte Witterung seit zwei Monaten her. Man mußte im Monat Junius und Julius den Ofen heitzen, um sich vor Kälte zu schützen. Am 11ten des Julius kamen desswegen die Gemeinden Tavetsch und Brigels mit Kreuz [in Procession] hieher [nach Disentis].

Pader Placi a Spescha

1816

L'erupziun dil vulcan Tambora igl onn 1815 sin l'insla dall'Indonesia Sumbawa ei stada ina dallas pli grondas dils davos 10'000 onns. El ha fiers gigantics diembers da tschendra e gas ella atmosfera ed entras quei sferdentau il clima global per 1 grad celsius.

Ell'Europa ha quei effectau:

- Igl onn 1816 ina fetg freida stad, «Igl onn senza stad (sulegl)»
- Miserablas raccoltas
- Fomaz e prezis exagerai per garnezi e biestga

Consequenzas pil Grischun 1816 – 1826:

Il Grischun ha pitü bravamein, en special ellas valladas aultas sco Tujetsch e l'Engiadina. Las consequenzas han teniu sur onns ora ord motivs ch'il terren era extrem bletschs, ils praus donnegiai e las reservas duvradas.

Denter 1816 e 1826 suondan:

- marschauna tardiva
- stads cuortas e bletschas
- igl atun raccoltas tardivas
- onns da grond deficit e munconza generala

Aunc 1826 vegn rapportau en Tujetsch da schliats onns da fein, sperditas da biestga, e temps da miseria. Ins tschintschava da «liungs unviarns e bletschas stads». Las consequenzas eran la scartezia da pavel e la biestga che carpentava dalla fom.

Per Tujetsch

- periodas cuortas dad alp
- il far risdiv croda
- fomaz tier la biestga
- mises vits e sut sforz da vender ni affittar

Pliras famiglias han stuiu vender la biestga ed emigrar en tuttas direcziuns dall'Europa. Quella sferdentada climatica e novas activitads tiels glatschers e lavinas pericliteschan vias ed alps.

Consequenzas tochen pressapauc igl onn 1830:

- Sminuziun dalla economia locala, oravontut l'alpicultura
- Emigraziun dalla giuventetgna sco luvriers da sesiun (per semeglia ella Baviera, a Milaun ed autro)
- Pietad populara intensivada e processions
- Agid urgent encunter la fomaz entras la baselgia

Tenor tradiziun orala ei quei temps vegnius numnaus «in dir, freid e bletsch» temps. Suenter 1830 davan tan las stads pli stabilas cun ina nova entschatta e positiva vesta

economica.

1817

Quei onn ei rutta ora a Selva ina malsogna epidemica, dalla quala biars, cunzun gliend veglia, seigien morts. Quella malsogna hagi ina pupratscha, «la veglia Claua», che mava dalla tiara giu a rugar, runau tier. «Ils cavels mavan tut ora, la carn luava quasi naven ed ei vegnevan da fleivel spért; ins numnava quella malsogna il «sturnez».

Aschia ha ina veglia persuna raquintau a pader Baseli Berther.

1817

La conseguenza digl onn senza sulegl ei semussada igl onn suandont cun gronda fomaz ed ha retschert il num «igl onn dalla fom».

«Ins sto dasperas buc emblidar, che 1817 ei stau igl onn dalla fom e che quei onn ha era purtau sias atgnas miserias en Tujetsch. Ins fagevi paun cun borlas; vegnev'ei ora in truffel d'arar la primavera, sche furschav'ins giu il tratsch e magliava criu. Ina femna da Selva mavi la primavera ora si Davet, sur Rueras, per urteis mangiauns, per haver enzatgei da magliar».
Pader Baseli Berther

1817

Ils 6 da fevrer, la sera entuorn las otg, ei ina gronda lavina vegnida giu sper Rueras, Tujetsch. Ella ei rutta ora al Piz Ner priu cun ella la neiv dall'entira Val Mila. Ella ha tschaffau il vitg, ils carstgauns e la biestga.

Da 47 personas ch'ei vegnidas cuvretgas ein 27 mortas. Ina suletta giuvna dunna ei vegnida cavada ora viva ord la fossa da neiv bia meters profund. Avon ch'ins ha saviu liberar ella cumpleinamein, ha ella confessau al plevon ed ei morta immediat suenter. Dasperas schischeva in buob da dudisch onns, che ha duront las vegn uras sut la neiv urau cun ella e schizun durmiu per in temps. El ei sebarschaus entras las plattas dalla pegna e fermamein blessaus. El ha surviviu, mo in bratsch era aschi maltractaus e smaccaus ch'il puls ei turnaus per suenter in pèr dis. La mumma e las duas soras dalla giuvna dunna eran mortas buca lunsch naven; ella veva aunc udiu mo paucs e fleivels suspirs dad ellas. En l'autra mesadad dalla medema casa era la mumma digl affon cun in pign buob; ella era fugida da ina stiva an l'autra. Leu eran aunc dus auters affons: in en letg ed in en la nanna. Omisdus ein vegni cuvretgs cun neiv e la manna ei restada serrada denter travs.

Cur ch'ina tiarza lavina ei vegnida ei la combra denter las stivas vegnida stuschada naven, aschia che tuttas treis eran sut il medem tetg – ellas vivevan aunc.

La famiglia Caduffei era stada satrada dalla lavina. Els ein mitschai atras il tgamin e la mesadad dalla casa fuva destruida. Vegnend la lavina han els fiers ils affons ord las finiastras. Els ein per salvar la veta curri naven, ils ins en camischa, ils auters vestgi.

En tut ein tschun mulins, ina resgia, nov casas e bia clavaus cun nuegl vegni destrui.

Da 29 tocs biestga ein 16 ni 17 ed in cavagl vegni cavaï ora vivs. Con tiers manedels era buca enconuscent.

La lavina ei vegnida tochen tier il letg dil Rein e schizun in toc anen per liung dil Rein. Tenor tut ils fastitgs ei vegniu concludiu che mo quater casas a Rueras seigien segiras encunter la lavina.

Pader Placi a Spescha

Onns pli tard (1818 – 1824) ei vegniu erigiu in'ustanza sut l'egida digl inschignier La Nicca per schurmetg encunter la lavina dalla Val Mila e Pulanera.

1820–1840

Numeruas cronicas attestan ils davos gronds avanzaments dil glatschers en las Alps.

1822

Sper las disgrazias climaticas ha ei era dau numerusas autras disgrazias. Ina da quellas ei il barschament dil vitg da Camischolas, ils 11 da fenadur 1822, il di da s. Placi, cun duas unfrendas. Ils vischins da Camischolas han cun agid da l'entira cuminonza dalla val ed d'ord la val cun ina collecta, dumignau communablamein quella disgrazia. Pader Placi a Spescha noda quella disgrazia sco suonda:

1822, den 11. des Heumonats als die meisten Einwohner bei der Feier in Disentis und die andern in den Alpen waren und im Ort nur 3 Männer, 1 Mann ohne Pfarrer und Kaplan, brannte das Dorf Camischolas im Tawätscher-Thal ab. Es bestund aus 15 Häusern, und ungefähr ebensoviel 16 Heuscheunen, in allem 31/29 Gebäude, und die mit Heu angefüllt waren. Die schöne Kapelle St. Anna ging zugleich im Rauch auf, und von ihr konnte nur das gerettet werden, was die Anstrengungen des H. Pfarrers Joseph Hiz, und des Hrn. Kaplans in Ruera Vigeli Venzin vermochten. Ein Kind und ein Weibsbild kamen dabei ums Leben. Man bedauert dabei 5 schön von Holz gebauten Häusern, die mit Nageldach versehen waren. – Dieses ist allenthalben ein Feuer und Hageljahr.

P. Placi a Spescha; Scartira Nr. 178–180, 1821.

1830 – 1900

Emigraziun en tiaras europeas vischinontas, la gronda part en Baviera e Württemberg, mo era singulas persunas ell'Italia, Frontscha e Spagna.

1834

Duront la malaura gronda dils anno 1834 ei il Drun carschius taluisa ch'el ei semenaus in tschancun sur la punt denter Sedrun e Gonda encunter la costa dil vitg da Sedrun e la costa dil santeri da sogn Vigeli. El ha menau naven duas retschas dallas fossas dil santeri. El funs dalla val, suenter il Rein Anterior, ha la malaura caschuna gronds donns vid la cultira. Ozildi «vegn» il Drun aunc adina, ina duas gadas ad onn ed igl ei buca da sutschazegiar el e sia forza e potenzial da caschunar donns. – Quella malaura ha caschunau donns da 9000 flurins; la malaura trenta onns pli tard, igl onn 1868, ha caschunau donns da 8265 flurins.

1835

Quei onn dumbra la Val Tujetsch 1116 habitonts. In diember da habitonts fetg ault, il pli ault dapi l'emprema dumbraziun da 1768. Ina suletta gada ei il diember staus sur melli e quei igl onn 1796 cun 1027 habitonts. Per cun igl onn 1941 survarga il diember ils melli e contonscha quei onn 1176 habitonts. Dapi lu crescha il diember successivamein. Ina survesta dil moviment dalla populaziun a partir dall'emprema dumbraziun 1718 entochen igl onn 1850.

1718	832
1730	798
1768	888
1778	811
1786	904
1791	994
1796	1027
1802	858
1803	900
1805	860
1808	900
1835	1116
1838	850

1848 879
1850 978

1836

Nadalnotg, ils 24 da december, la sera, circa allas quater, ein statalter Monn Giachen Antoni da Zarcuns e Schmed Sep Lurenz da Rueras vegni ella lavina a Giuv, ferton ch'els pervesevan. L'auter di ein els vegni cavai ora morts. Aunc quater auters perveseders ein vegni quei di ella lavina, ein denton mitschai cun la veta. Lavina da Giuv destruescha era entgins clavaus.

Il Grischun Romontsch 1837, nr. 45, dils 3-1 scriva: "*Ei vegn detg ch'en Tujetsch a Sogn Giachen hagi la lavina priu dus giuvens. Ei fuss d'augurar che quella nova seconfirmass buca.*" Probabel ils sura dus.

1850 – 1930

Denter 1850 e 1930 han 300 persunas bandunau la Val Tujetsch ed anflau ina existenza els Stadis Uni dall'America. Pils biars ei l'emigraziun stada la suletta pusseivladad da mitschar dalla pupira economica. Per auters eis ei stau in'aventura che ha motivau d'ughegiar e riscar. Als pli biars eis ei reussiu. La historia dall'emigraziun da Tujetsch ei era rappresentativa per pliras ulteriuras vischnauncas dalla Cadi e Surselva

1850

Communicaziun digl Uffeci de Cumin

La suprastonza da Tujetsch fa da saver, che sut ils 27 schaner vargau, seigi, cun caschun ch'ils vischins da Selva ein fugi ord lur vitg muort la tema dalla lavina, barschau giu dadens Selva ina casetta e clavau al Martin Peder, il qual ha tier quest barschament piars 16 armauls e 5–6 tschuncheismas fein, aschia ch'il donn total s'augmentescha tenor schazegiada sin la summa da frs. 1010.

Martin Peder ein um vegl inhabels tier la lavur, ha 7 siat affons dils quals dus ein da negin agid, quels vivevan cun prender si praus per tscheins, semudergiavan cun il lur e cun far fein a pastg, lur facultad ei enviers il donn pitiu fetg pigns, ed havend piars sco tut il muvel en ina gada, sch'eis ei ad els era buca pusseivel da segidar; plinavon fa la sura suprastonza da saver che sut ils 2 fevrer hagi la lavina smaccau ensemen la casa da Vigeli Werth a Selva cun tuttas mobillas etc., il donn schazegiau ei 375 frs., quei ei ina famiglia zun munglusa, dus fargliuns, cun bab e mumma che san luvrar nuot e stuevan ussa vegnir susteni dalla vischnaunca, aschia ch'els ein ussa effectivamein bess ora sin gassa senza tetg e senza tut. Quellas duas familias vulan encurir agid tier la cassa d'Agid dil cantun, per quella fin eis ei aber necessari ch'ei vegni priu si in collecta el cumin, schiglioc vegn ei da leu anora prestau negin agid.

Muster ils 28 da fevrer 1850

1858

Strusch ha ei giu dau la davos'ura digl avrel, sche ha il matg spert bess anavos nus el pli sgarscheivel unviern. Quels che tegnan sin striegn sesmarveglian buca giud la sgarscheivola nevada. L'aura ei gie secavistrada la notg da Walburga, dils 30 d'avrel sigl 1. da matg, nua che las strias tegnan da vegl enneu in solemn barlot cul demuni ... sche ha ei entschiet a never e neviu 55 uras, bunamein treis dis e duas notgs!

A Mustér, Medel e Tujetsch seregordan umens da siatonta onns e varga onns buca da quellas nevas. Egl emprem liug er'ei 9 – 10 quartas neiv, ella Val Medel e Tujetsch 11 – 12 quartas. Ellas vischnauncas da Sursassiala ei tutta communicaziun stada interrutta per treis dis, als perveseders er'ei in grond sforz per arrivar en nuegl e tiella scartezia da fein, stuevan

ei aunc semudergiar per survegnir aua. Per ventira ha igl Altissim pertgirau da grondas disgrazias. Ils habitonts da Selva ein fugi a dretg temps en Novaselva, la lavina da cauld ei vegnida giu, mo senza far donn al vitget. La bun'aura luenta la neiv cun ualti bien ried ed aschia eis ei da sperar ch'ins possi scappentar ils tiers.

Gasetta Romontscha 08-05-1858 nr. 19

La val denter 1200 – 1850

Ina resumaziun da 650 onns Val Tujetsch

Igl onn 1205 ei vegnida baghegiada a Sedrun l'emprema baselgia, che fuva la baselgia da vallada per l'emprema cuminonza religiosa ella val. Decennis avon fuvan ils emprems colonists arrivai. Quella colonisaziun ha aunc cuzzau onns e contonschius culs Gualsers ina mischeida da colonists e colonistas da viarva tudestga.

Ils 650 onns ein a nus enconuscents entras disgrazias ed uiaras, barschaments, lavinas e sgarscheivlas epidemias sco las murias e pestilenzas. Baselgias e capluttas ein enconuscentas cun lur onns da construcziun e raquantan ina part dalla historia dalla val. Il numerus documents plaidan dallas alps. Pér a partir digl onn 1800 vegn la historia dalla val pli transparenta ed enconuschenta.

La val ei semidada cun la midada dil clima e la gronda sbassada dil cunfin digl uaul. Era ils habitonts dalla val ein semidai cun lur structuradas da viver. Fuva la tratga da nuorsas ils emprems tschentanners la sparta da viver essenziala, semida quei en la tratga d'armauls che contonscha 1850 in ault nivo cun rodund 4000 animals, da quei rodund 2500 cauras e nuorsas, che fuvan d'alimentar il temps d'unviern. Ina sfida!

Ils beins dils Gualsers els aults dalla val ein vegni bandunai e la populaziun ei seconcentrada el funs dalla val. Enteifer quels sis ed in miez tschentanners sereduceschan ils 66 beins ed uclauns dil 15/16avel tschentanner a mo pli 11 habitadis. Tschamut, Selva, Dieni, Rueras, Zarcuns, Camischolas, Gonda, Sedrun, Bugnei, Surrein e Cavorgia. Ils uclauns dalla val bandunai il davos ein stai: Giuv (1805), Nacla, Canadal, Cavorgia-sura e Nislas (19avel). En quels vivevan tenor la dumbraziun dil pievel da 1768 aunc adina 86 persunas en 22 fiugs. Sedrun daventa il center ecclesiastic e liug principal.

Patratgs finals

Suenter la fin dil Pign temps da glatsch e las midadas climaticas

Entuorn igl onn 1850 ei il Pign temps da glatsch plaun a plaun ius a fin. El Grischun ha il clima entschiet a vegnir pli migeivels: ils unviars ein daventai pli cuorts e meins stregns, las stads pli liungas e cauldadas. Ils glatschers, ch'eran s'avanzai sur tschentanners dapi circa 1250 e formau las vals e priu naven pastiras, han ussa entschiet ad ir anavos.

Lavinas ein restadas e fomazs e murias e pestas ein svanidas, il temps da vegetaziun ei seprolungius e las alps ein s'engrondidas ed han dau a dapli biestga pastg e vivonda. Il garnezi ei carschius era pli els aults (Tschamut sin varga 1600 m s.m.), mo senza sustegn da chischners ei il graun il pli savens buca madiraus sigl èr. Pass e vias alpinas che fuvan savens stadas bloccadas da neiv permanenta, da prighel da crappa, ein vegnidas duvradas regularmein per pli liung temps durant igl onn.

En Tujetsch, sco en autras parts dil Grischun, ha la fin dil Pign temps da glatsch muntau l'entschatta d'ina perioda climatica pli quieta ed economicamein pli stabila. La populaziun veva sur decennis pitiu e serevegn suenter ils grevs onns e decennis da ferdaglias e miserias. Tut quei veva surcargau ils habitonts, buca senza consequenzas sin la sanadad.

Il maletg dalla cuntrada ch'ins vesa oz – cun alps verdas, glatschers che

seretilan ed uauls che creschan plaun a plaun viers ils aults, pastiras surcarschidas cun pegns e plontas, era entras la munconza da pasculaziun – ei in segn visibel da quella midada climatica suenter 1850 ed ussen el 21avel tschnetaner. In process natural.

Oz ei il medem process en ferm moviment e bein veseivels era ella Val Tujetsch, mo quei ei deplorablamein la conseguenza dalla midada da clima caschunada dalla carstgaunadad.

Tarcisi Hendry 2026